

弘

簡

錄

弘簡錄卷一百七十一

明刑部員外郎仁和弘齋邵經邦學

皇清翰林院侍講學士四世孫遠平校閱

后妃 宋七之一

太祖母杜氏

后賀氏

宋氏

太宗后尹氏

李氏

真宗母李氏

后潘氏

劉氏

妃楊氏

仁宗母李氏

后郭氏

曹氏

妃張氏苗氏  
馮氏

英宗后高氏

神宗后向氏

妃朱氏  
陳氏

哲宗后孟氏

妃劉氏

徽宗后王氏  
鄭氏  
妃王氏  
劉氏

高宗母韋氏

欽宗后朱氏

杜氏定州安喜人父爽母范氏宣祖聘為婦初夢日入懷生太

祖其夕有神光照室中又夢神人捧日置于腹誕太宗凡生五

子封爵見後二女燕國陳國周顯德三年太祖爲定國軍節度使封南陽郡太夫人陳橋變時人走報太后點檢已作天子太后曰吾兒素有大志今果然祗位尊爲皇太后贈父太師建隆二年五月癸亥朔不豫帝侍藥餌不離側爲赦雜犯死罪以下疾亟召趙普入受遺命因問帝曰汝知所以得天下乎正由周世宗使幼兒主天下耳使周有長君天下非汝有也汝百歲後當傳位光義再傳光美光美傳德昭四海至廣萬幾至衆能立長君社稷之福也帝泣拜受命后顧謂普曰爾同記吾言不可違也遂崩于滋德殿年六十初諡明憲祔享太廟乾德二年更諡昭憲合祔安陵

太祖三后賀氏陳留人晉開運初父景思爲軍校與宣祖同居護聖營因聘娶焉後官右千牛衛率府率后性溫柔恭順動以

禮法初與杜后同封會稽郡夫人生秦晉二公主并魏王德昭  
周顯德五年薨年三十建隆三年四月追冊爲皇后葬安陵西  
北初享別廟神宗時祔太廟諡曰孝惠 王氏邠州新平人父  
饒彰德軍節度太祖爲殿前都點檢聘爲繼室恭勤不懈仁慈  
御下事杜太后得其惟心初封琅邪郡夫人建隆元年八月冊  
爲皇后常服寬衣佐御膳善鼓琴晨起誦佛書乾德元年十二  
月崩年二十二葬安陵北同享別廟太平興國二年祔享太廟  
諡曰孝明

宋氏洛陽人父僅外戚有傳母漢永寧公主后甫及笄隨母入  
見周太祖得賜冠帔乾德五年僅任華州節帥隨母歸鎮太祖  
召見亦賜冠帔俄復隨母來賀長春節仇王后崩開寶元年二  
月遂納入宮爲皇后時年十七性柔順好禮每帝視朝退常候

迎接入佐御饌太祖崩后在內廷見太宗愕然遽呼曰吾母子之命皆託于官家太宗曰共保富貴無憂也更號開寶皇后遷居西宮雍熙四年移居東宮至道元年四月崩年四十四三年正月祔葬永昌陵北神主享于別廟神宗時升祔太廟諡曰孝章

太宗三后尹氏天水人徙大明父廷勛滁州刺史后歸太宗早薨追冊皇后諡淑德祔廟符氏父彥卿外戚有傳周顯德中娶建隆初封汝南郡夫人再進楚國夫人開寶八年薨年三十四葬安陵西北追冊皇后諡懿德享于別廟至道三年升祔太廟

李氏功臣處耘女開寶中大祖爲聘既納幣會太祖崩太平興國三年始入宮年十九雍熙元年十二月立爲皇后性恭謹莊

肅撫百諸子及嬪御甚厚真宗立尊爲皇太后居西宮嘉慶殿  
咸平二年別建宮居之名曰萬安咸平六年十二月甲戌不豫  
詔求良醫赦天下死罪一等流以下釋之景德元年崩年四十  
丑祔葬永熙陵諡曰明德從禮官請三后以次同祔太宗廟室  
李賢妃真定人父英乾州防禦使開寶中太祖聞妃有容德爲  
太宗納之初封隴西郡君進夫人生楚王元佐太宗卽位夫人  
夢日輪逼已以裾承之光耀遍體驚而寤遂生真宗太平興國  
二年薨年三十四真宗卽位追上尊號爲皇太后諡曰元德咸  
平三年祔葬永熙陵命宰相李沆爲園陵使車駕詣普安院撰  
宮素服行禮拜伏鳴咽知制誥梁周翰撰哀冊神主祔別廟祥  
符元年追贈父檢校太尉安國軍節度使常山郡王母魏國太  
夫人三年禮官趙湘請以后祔太宗廟室真宗以爲重事令執

政會議至六年秋宰相王旦率羣臣表請后尊號中去太字升  
祔太廟明德之次從之

真宗三后潘氏功臣美之女初在韓邸聘納封莒國夫人端拱  
二年薨年二十二卽位追冊皇后諡莊懷葬永昌陵之側陵名  
保泰神主享于別廟 郭氏太原人父守文見外戚傳真宗在  
襄邸復聘之連封魯泰國夫人生溫王禘周王祐昌王祗信王  
祉欽王祈皆早亡真宗嗣位立爲皇后謙約惠下惡奢靡族屬  
入謁禁中服飾華侈必加戒勗遇以家事求請於上終不許兄  
子出嫁欲祈恩賚后但出裝具給之上素禮重景德四年從幸  
西京還以疾崩年三十二上深加嗟悼禮官奏七日釋服特增  
至十三日駕發引命學士楊億撰哀冊葬永熙陵西北初諡  
莊穆祔神主別廟後升祔真宗廟

劉氏太原人曾祖惟嶽祖延慶晉漢間爲右驍衛大將軍父通  
宋初掌禁旅從潘美征廣南文累戰北而積勞至虎捷都指揮  
使嘉州刺史征太原道卒贈潁州防禦使后方襁褓而孤鞠於  
母麗氏外家因徙益州華陽年十五蜀人龔美攜以入京納于  
襄邸王乳母秦國夫人性嚴整爲太宗言令王斥之王不得已  
置指使張耆家卽位召爲美人因以美爲兄弟更其姓劉祥符  
中自脩儀進德妃專寵後宮會章穆崩欲立爲后學士李迪言  
妃起於寒微不可以母天下帝不從竟立之天禧中帝久疾政  
事多決於后時宗人交橫于蜀尊民鹽井事聞上以后故欲赦  
之寇準請必行故失后意旣而詔皇太子開資善堂引大臣決  
事后来裁制於內帝崩遣詔尊爲皇太后軍國重事權取處分  
于謂等請太后御別殿后遣張景宗雷允恭諭旨皇帝視事當



朝夕在側何須別御一殿馮拯等三上表請帝與后五日一御  
承明殿帝位左太后位右垂簾決事百官表賀太后哀慟從有  
司請制令稱予而便殿處分仍稱吾以生日爲長寧節頒父諱  
於天下出入御大安輦鳴鞭侍衛如乘輿天聖二年上尊號曰  
應元崇德仁壽慈聖皇太后御文德殿受冊三年正月辛卯長  
寧節帝率羣臣及契丹使上壽于崇政殿五年正旦御會慶殿  
羣臣及契丹使者班廷中帝再拜跪上壽七年冬至又率百官  
朝于會慶殿并上壽九年正月詔長寧節賜百官衣并宴麟並  
如乾元節明道元年冬至復御文德殿帝率羣臣上壽有司陳  
黃麾仗設宮架登歌二舞二年二月乙巳朔謁太廟乘玉輅服  
袞衣九龍冠以冠齋于廟質明服袞衣十章減宗彘水藻去冠  
劍儀前上燒薦獻七室皇太妃亞獻皇后終獻禮畢

加上尊號曰應天齊聖顯功崇德慈仁保壽皇太后三月庚寅  
不豫大赦除常所不原悉召天下醫速馳赴京甲午崩壽六十  
五以后服斂諡曰莊獻明肅葬永定陵之西北舊制后惟二諡  
稱制加四諡自后始追贈三世皆太師中書令父卒初窆京城  
西贈尚書令諡武懿後改葬祥符鄧公原加封魏王真宗御製  
祭文后臨奠母越國夫人錢氏加號魏王妃兄惟演子瞻山集  
賢校理加二官有異知進者通之友婿亦贈衛尉卿先是仁宗  
始生后鞠爲己子。傾復甚至卽位。嘗諭輔臣曰。皇帝聽斷之暇。  
宜詔名儒講習。以輔其德。命設幄崇政殿之西廡。日延近臣侍  
講。讀其所以保護盡力。而帝奉之亦甚備。雖春秋長。猶不知宸  
妃所出也。兼以恩威在己。賜與有節。自丁謂曹利用貶竄天下  
惕然畏之。漕臣劉緯從京西還。言賸糧千餘斛。乞付三司。后問

曰卿識王曾張知白呂夷簡魯宗道否此豈因美餘進哉柴李  
二公主見猶服髮髻念其已老賜以珠璣帟首時潤王元汾夫  
人李氏亦老髮且落因以爲請后曰大長公主尊行也若趙家  
老婦寧可比也侍者見上嬪御簪珥珍麗欲效之后諭曰彼皇  
帝嬪御飾也汝安得學小臣方仲弓上書請依武后故事立劉  
氏七廟程琳又獻武后臨朝圖后擲其書于地曰吾不作此負  
祖宗事晚節稍進外家任內官羅崇勳江德明等訪察外事遂  
勢傾中外兄子從德死姻戚門人廝役拜官者數十人御史曹  
脩古等論奏悉逐之進士林獻可疏請還政竄之嶺南侍御史  
張存諒不聽崩後始內徙諸嘗爲后所謫者復死者官其後言  
者多追詆垂簾時事帝曰此朕所不忍聞也下詔戒中外毋輒  
言惟演請三后益祔帝詔三省與禮院議皆以章穆位崇中盛

已祔真宗廟室自協一帝一后之文明肅處坤元之尊章懿威  
日符之貴功德莫比宜崇建新廟同殿異室歲時薦饗一川太  
廟之儀慶曆五年禮院復請遷懿德明德元德同祔故事一併  
章獻章懿遷祔真宗廟從之

淑妃楊氏益州郾人祖瑫父知儼儼弟知德隸禁軍爲天武副  
指揮使妃年十二得選入皇子宮卽位拜才人進婕妤至懿儀  
特升從一品位昭儀上帝東封西祀凡巡幸皆從時章獻尙爲  
脩儀位幾與埒而妃通敏有智一意奉順初無所忤日見親愛  
加封淑妃仁宗方乳章獻使護視凡起居飲食必與之俱所以  
擁佑扶持恩意勤備真宗崩遣制尊爲皇太妃仁宗卽位常召  
其姪承德見禁中欲授以諸司副使妃辭曰小兒豈勝大恩更  
命爲右侍禁章獻崩遣詣尊爲太皇后與皇帝同議軍國事閤

門趣百僚賀中丞蔡齊月臺吏母追班同御史龐籍入白執政  
剛去同議軍國事諸第存后號奉緡錢二萬助后湯沐後更名  
所居宮曰保慶稱保慶皇太后景祐三年無疾崩年五十三殯  
於皇儀殿諡曰莊惠祔葬永定陵帝思其保護之恩命禮官議  
加服小功帝未有嗣后母勸帝擇宗子近屬賢者養于宮中卽  
英宗也英宗立言者謂禮慈母於子祭於孫止請廢后廟壅主  
園陵英宗弗欲遽下有司議未上會帝崩遂罷 貴妃沈氏宰  
相倫孫女祥符初以將相家女選入宮爲才人歷美人婕妤充  
媛爲人淑儉少華上以其家世厚待之眞宗將冊后以問叅政  
趙安仁以沈氏對翼曰又語王欽若欽若笑曰臣固知其必以  
此言彼常爲倫門客上以爲然未幾罷安仁政事慶曆四年封  
爲德妃婉儀杜氏爲賢妃俄沈氏又進貴妃薨年八十三許出

殯其家車駕臨視輟朝諡昭靜

宸妃李氏杭州人祖廷嗣錢氏時爲金華主簿父仁德終左班殿直妃初入宮爲司寢侍章獻太后莊重寡言嘗夢二日在天一忽墜以裾承之旣而有娠從帝臨初臺玉釵墜妃心惡之帝卜釵完當生男子左右取以進果不毀帝甚喜已而果生仁宗在襁褓時劉后取爲己子妃嘿處嬪御中未嘗自異人畏劉后亦無敢言封崇陽縣君進才人歷婉儀順容從守永定陵明道元年疾革進位宸妃薨年四十六太后欲以宮人禮治喪于外呂夷簡奏禮宜從厚太后遽引帝起有頃獨坐簾下召問曰一宮人死相公云云爲何夷簡曰臣待罪宰相事無內外皆當預聞后怒曰相公欲離間吾母子耶夷簡從容曰陛下不以劉氏爲念臣不敢言尙念劉氏則禮宜從厚太后悟夷簡請治喪用

一品禮殯于洪福院。又語都知羅崇勲。當殯以后服。川水銀實棺。異時勿謂夷簡不言也。崇勲如言入奏。太后從之。太后崩。燕王始爲帝言。陛下乃李宸妃所生。妃死以非命。帝號慟累日。不視朝。下詔哀痛自責。尊爲皇太后。諡莊懿。卽日駕幸殯所。哭臨祭告。易以梓宮。開視玉色如生。冠服與后無異。嘆曰。人言其可信哉。遇劉氏加厚。陪葬永定陵。廟曰奉慈。又卽景靈宮建神御殿。曰廣孝。舊制后諡必冠帝號。慶曆中。禮官因眞宗尊號奉改。莊懷莊穆莊獻莊懿莊僉爲章升祔太廟。

仁宗二后郭氏。應州金城人。祖崇。見外戚。天聖二年。與左驍衛大將軍張美女同被選入宮。上欲立張氏。太后雅意屬郭氏。而以張氏爲美人。郭后旣立。倚章獻之勢。頗驕橫。後宮爲所遏。不得進。太后崩后。遂見疎。帝專寵張美人。明道二年。薨。追冊爲后。

益幸美人尙氏楊氏賞賜無算恩寵傾京師后妬之數與忿爭尙氏於上前不遜有侵后語后不勝忿批其頰上自起救之誤批上頸上大怒都知閤文應因謀廢后勸上以爪痕示執政上問宰相呂夷簡古來有此事否夷簡有怨于后對曰古亦有之上意遂決詔稱皇后無子自願入道特封爲淨妃玉京冲妙仙師賜名清悟居長寧宮號金庭教主冲靜元師後帝頗念之遣使存問賜以樂府后和答以進辭甚愴惋帝益悔恨有日密召入內后辭曰若果回天須百官立班受冊方可退不赴明年屬有小疾遣文應挾醫診視數日以恭薨聞中外疑文應進毒而不得其實上深悼之三年正月壬辰追復皇后丁酉葬之惟停諡冊祔廟之禮

曹氏武惠王彬孫女郭后廢詔聘入宮景祐元年九月冊爲后



素性慈儉重女工深知稼穡常於禁苑種穀親蚕不樂嬉遊帝  
將以閏正月望夕再張燈后諫止之後三日親從官顏秀等作  
亂傷殿下宮娥聲徹帝所宦者以乳嫗歐小女子紿奏后叱曰  
賊在近殺人敢妄言耶度賊必縱火陰遣人挈水踵其後果舉  
炬焚簾木隨滅之所遣宦侍親剪髮諭之曰行賞用是爲驗故  
爭盡死力賊遂禽滅英宗卽位尊爲皇太后帝感疾請權同處  
分軍國事上太后宮殿名曰慈壽金稱聖旨出入儀衛如章獻  
故事檢校曹氏及左右臣僕毫不假借宮省肅然中外章奏日  
數十往往援經史以決事明年四月帝疾愈后手書撤簾還政  
帝持書不下及秋始行之宰相韓琦白后求去荅曰相公安可  
告退老身合居深宮耳每日在此甚非得已琦奏曰果爾雖前  
代馬鄧不如未嘗將以何日撤簾太后遽起琦命嬪儀司撤簾

猶於屏後見御衣也。神宗立，加尊太皇太后名宮曰慶壽。帝致極誠孝，所以承迎娛悅無所不盡。從行登輦，每先後策掖。后亦慈愛天至，或退朝稍晚，必至屏扃候，鵬親持饌飲食。帝王安石當國亂政，后乘間語帝曰：「祖宗法度，不宜輕改。」熙寧宗祀前數日，帝至后所，語曰：「吾昔聞民間疾苦，必以告仁宗，因赦行之。今胡不然？」帝曰：「時無他事，有亦當爾。」后曰：「吾聞民間甚苦青苗助役，亟宜罷之。」安石誠有才學，然怨之者衆，欲愛惜保全之，不若暫出之於外。帝爲悚聽，舊制外家男子不得入謁，后春秋高，第伯亦老，帝數言宜使入見，不許。他日復請，乃許之。與伯偕詣后，問少頃帝先起，欲令侍仰親意。后遽曰：「此非汝所得留。」趣遣出。晚得水疾，侍醫莫能治。元豐元年，驛召天下醫者。二年冬，疾甚。帝宵視寢門，經旬衣不解帶。崩日，壽六十四。初，帝嘗有意燕剗。

已與大臣定議詣慶壽宮白其事。后曰：「事體至大，吉凶悔吝，生乎動，得之不過南面受賀而已。」萬一不諧，則生靈所係，未易以言苟可取。太祖、太宗取之，知何待今日？帝曰：「敢不受教。」蘇軾以詩得罪，下御史獄，且不測。后違豫，中聞之，謂帝曰：「嘗憶仁宗以制科得軾，兄弟喜曰：『吾爲子孫得兩宰相。』今聞軾以作詩繫獄，得非仇人中傷乎？惜至於詩，其過微矣。吾疾勢已篤，不可以究濫，致傷中和。帝涕泣軾由此得免。及崩，帝哀慕毀瘠殆不勝喪。有司上諡曰：「慈聖光獻附葬永昭陵。」推恩曹氏進官者四十餘人。

貴妃張氏，河南永安人。祖頴山進士，終建平令。父堯封孝謹，好學，登進士，爲石州推官。蚤卒。母錢氏，將挈孤隨從。父堯佐官屬，以道遠辭，勿無所依。母乃納于章惠皇后宮。妾長巧慧多智，善

於承迎得幸仁宗盛有寵勢動中外慶曆元年封清河郡君歲  
中爲才人遷脩媛皇祐初進貴妃後五年薨年三十一帝甚哀  
悼治喪皇儀殿追冊爲皇后諡曰溫成爲起園陵卽園立廟享  
祭用樂追封父中書令清河郡王諡景思母越國太夫人而堯  
佐亦因緣遂致通顯 苗氏開封人父繼宗母許氏先爲仁宗  
乳保及登位妃以容德入侍生雍王昕福康公主封仁壽郡君  
山才人昭容進位德妃育英宗於禁中命妃擁佑頗有恩踐阼  
酬其前勞加封貴妃贈父太師吳國公母陳楚二國夫人福康  
下嫁當廼恩外家抑不肯言元祐六年薨年六十九帝輟朝出  
奠發哀苑中諡曰昭節 周氏開封人幼育張貴妃所爲女得  
侍仁宗生秦燕國兩公主帝崩妃日一蔬食屏處一室誦佛書  
困則假寐覺則復誦晝夜不解衣者四十年二主下嫁連進至

賢妃徽宗加貴妃歷五朝勤約一致積所俸賜啓壽藏於周氏  
塋南傍建僧舍費緡錢六萬皆出貯儲燕國先亡詔許山外第  
與親戚相往來年九十三薨諡昭淑 楊氏定陶人以章獻后  
姻選爲御侍封原武郡君進美人性端麗機敏妙音律組紉書  
藝一過目如素習父忠爲侍禁仁宗欲加獎擢辭曰恩澤微倖  
恐啓左右諛謁之端帝悅命徙居肅儀殿贈其祖貴州刺史仍  
官其叔第五人郭后旣廢楊尙二美人益有寵每夕侍寢上體  
多爲之憊景祐元年帝忽不豫楊太后亟以爲言並廢尙美人  
爲道士居洞真宮楊美人居瑤華宮賜名宗妙後復召爲婕妤  
歷脩媛脩儀熙寧五年薨年五十四贈德妃 馮氏東平人曾  
祖炳知雜御史祖起兵部侍郎以良家女侍仁宗生邢魯國二  
公主封始平郡君累加才人婕妤脩容在禁掖幾六十年始終

五朝勳節禮度薨年七十七贈賢妃

英宗皇后高氏家世見功臣及外戚母曹氏慈聖光獻妃姊也  
故后少鞠宮中生與英宗同年既長遂婚濮邸生神宗岐嘉二  
王寶安壽康二主嘉祐八年冊爲皇后神宗立尊爲皇太后居  
寶慈宮元豐八年帝不豫宰執王珪等入問疾乞立皇太子太  
后權同聽政帝頷之退見太后時哲宗爲延安郡王后擁於簾  
下泣見珪等曰皇子性至孝從學穎悟絕不好弄已誦論語七  
卷自上疾未常去左右手書佛經以祈福乃令王出簾外見珪  
等皆拜且賀是日降制立爲皇太子陰敕中人梁惟簡製十歲  
小兒黃袍束進蓋密爲踐祚倉卒備也哲宗嗣位尊爲太皇太  
后宮名崇慶殿名壽康臨朝大誥熙豐弊政仰司馬光呂公著  
文彥博以復祖宗法度爲先務且令亟疏人才可用者進於

是以常平舊式改青苗以嘉祐差役參募役除市易害民之法。  
道茶鹽煩擾之禁。捐邊砦不毛之地。一時海宇危而復安。契丹  
主戒勿生事疆場。曰南朝盡行仁宗政矣。上元燈宴后母當入  
觀止之。曰夫人登樓上必加禮。是由吾故而越禮制於心。殊不  
安。但令賜之燈燭。歲以爲常。蔡確坐車蓋詩得罪。后謂大臣曰。  
蔡確妄稱有定策功。扇搆事端。爲異時眩惑地。吾不忍明言。姑  
託訕上爲名逐之耳。臨朝凡九年。力絕內降。抑止外家私恩。弟  
士林爲崇班帝以供奉久欲遷其官。辭曰士林獲升朝籍。分量  
已過。豈宜援先后家比姪公綰公紀當轉觀察使亦止之。帝請  
至再。僅遷一秩。終后之世不敢改時朝廷清明。華夏綏定。人以  
爲女中堯舜。有疾之日。帝不視事。禱于天地宗廟社稷諸陵。并  
祫瀆宮觀祠廟。致天下。崩年六十九。諡曰宣仁聖烈神主。祔廟。

葬永厚陵詳見帝記

神宗后向氏宰相敏中曾孫女治平三年歸于穎邸初封安國夫人卽位立爲皇后帝不豫贊宣仁定建儲之議立哲宗尊爲皇太后初居慶壽後殿名隆祐宮殿曰慈徽凡事一遵宣仁不以恩私外家帝將卜后及諸王納妃后救向族屬勿以女冀選中族黨有欲授例換閭職及爲選人求京秩者后悉拒之帝倉卒晏駕奸相章惇有違言欲立母弟簡王后曰老身無子諸王皆神宗庶子莫難如此分別惇復曰若長則當立申王后又曰申王有疾不可惇尙欲言曾布叱曰章惇聽太后處分遂決策迎端王惇不能沮徽宗立請太后權同處分軍國事性簡素不立誕節不御正殿不避家諱一意賓召故老還所斥逐賢士及寬薄徭賦息兵省費愛民崇儉中外咸稱能守家法臨朝纔六



月卽遷政于帝十二月甲午不豫禱于宮觀祠廟嶽瀆明年正月崩壽五十六諡曰欽聖憲肅葬永裕陵祔廟如儀數加恩兩身宗良宗回皆位開府儀同三司加封郡王自敏中以上三世亦追列王爵非常典也

妃朱氏開封人本姓崔父傑早世母李氏更嫁朱士安從其姓熙寧初選入宮爲御侍進才人至婕妤生哲宗及蔡王徐國公主累封德妃卽位尊爲皇太妃元祐三年宣仁下詔春秋之義母以子貴其尋繹故實務致優隆命有司具興蓋仗衛冠服悉侔皇后紹聖中欽聖復命卽閤建殿改車爲輿出入由宣德東門百官上牋稱殿下名所居爲聖瑞宮徽宗立尊爲聖瑞皇太妃崇寧元年二月有疾慮京畿凶辛丑薨年五十一追冊爲皇太后祔廟諡曰欽成 陳氏開封人自幼穎悟莊重入爲掖庭

御侍卽得幸生徽宗進美人神宗崩命守陵殿恩顧舊恩毀瘠  
骨立左右進粥藥麾使去曰願得早侍先帝足矣年甫三十二  
薨建中靖國元年追冊爲皇太后諡曰欽慈與欽成陪葬永裕  
陵 林氏祖特父洙見宰輔彙妃幼選入宮侍神宗初封永嘉  
郡君升美人生燕王俛越王似并邢國公主進婕妤元祐五年  
薨詔用一品禮葬贈貴儀至賢妃 同時武氏失其家世亦以  
選入元豐五年進才人生吳王似并賢和公主歷美人婕妤徽  
宗卽位進昭儀至賢妃大觀元年薨乘輿臨奠輟朝諡惠穆  
哲宗后孟氏洛州人祖元眉州防禦使馬軍都虞候父在閤門  
祇候后年十六詔選世家女百餘入宮宣仁與欽聖皆愛之教  
以女儀諭宰執孟氏子能執婦禮宜正位中宮又以近世儀頗  
簡略詔禮官議冊后六禮詳見弘道錄冊立之日仍詔贈元爲太尉

進父榮州刺史封母王氏華原郡君及太后崩劉婕妤有寵后  
恩益衰章惇陰附婕妤欲誣宣仁以后經事欲併廢之而立婕  
妤會所生女福慶公主有疾后姊頗知醫以嘗愈后危疾得出  
入禁掖至是用藥弗效持道家符水入泊后驚曰姊不知宮中  
禁嚴耶令左右藏之俟駕至具言其故卽於帝前焚符帝亦以  
常事不較而宮禁相傳厭魅之端作矣未幾后養母聽宣夫人  
燕氏尼法端與供奉官王堅爲后禱祠事聞上頗疑之詔入內  
押班梁從政管當御藥院蘇珪卽皇城司鞠問逮宦官宮妾幾  
三十人榜掠備至肢體毀折至有斷舌者獄成命侍御史董敦  
逸覆錄罪人過庭下氣息僅屬無一人能出聲者敦逸秉筆疑  
未下內侍郝隨等以言脅之敦逸畏禍就惇與隨所構以奏牘  
上詔廢后出居瑤華宮賜號華陽教主玉清妙靜仙師法名沖

眞詔下日天爲陰翳聞者寃之帝亦尋悔曰章惇壞我名節元符末欽聖臨朝有布衣何文正上書欲復后位號卽命以官徽宗下詔還后大內號元祐皇后崇寧初隨又諷蔡京使馮澥上書臺臣錢通等連章論列徽宗從之詔依紹聖詔旨復居瑤華宮加賜希微元通知和妙靜仙師靖康初瑤華宮火徙居延寧宮又火出居相國寺前私第欽宗卽位議再復尊號爲元祐太后詔未下而京城陷因是得獨存張邦昌用太祖迎周太后入西宮故事尊爲宋太后迎居延福宮胡舜陟馬伸言政事當取后旨乃復迎入禁中仍號元祐皇后始御內東門小殿垂簾聽政尋降手書播告天下遣馮澥李回及兒子忠厚奉迎康王卽皇帝位是爲高宗后以是日在東京撤簾建炎元年尊爲元祐太后奉如東南尙書省言犯后祖名易以所居宮名稱隆祐太

后上將幸揚州。命侍衛指揮郭仲荀衛后先行駐揚。會張浚請先定六宮所居地。詔忠厚與苗傅扈至杭州。踰年。傅與劉正彥謀作亂。太后諭曰。自蔡京王黼變亂朝政。童貫起邊事。致國家大禍。今皇帝聖孝無失德。止爲黃潛善汪伯彥所誤。皆已逐矣。汝寧不知耶。傅等必欲立皇太子。后曰。今強敵在外。我一婦人抱三歲小兒。何以令天下。傅等泣請。太后力拒之。帝聞事。急詔元子禪位。太后垂簾聽政。每見凶黨曲加慰撫。傅等皆喜。召見韓世忠妻梁氏。勉令速來。以清殿陛。及勝非誘傅等復辟。命王世脩草狀進呈。太后喜曰。吾責塞矣。手札趣帝還宮。卽欲撤簾。趙鼎張浚謂復辟功大帝仍請一出御殿上皇。太后尊號太后。問浚忠義欲一識面。帝爲召至禁中。垂簾見之。承議郎馮楫常詣書前。傅勸復辟。太后白其事。楫得遷秩。將幸建康。命錢樞鄭

設衛后繼發比至帝率羣臣迎于郊會防秋追命劉寧罷制置  
江浙衛往洪州百司非預軍事者悉從復慮敵人來侵命楊惟  
忠將兵萬人爲衛密諭同行膠康劉珪緩急取太后旨便宜以  
行會劉光世屯江州不爲備金果自大冶縣徑趣洪州康珪奉  
后行次吉州金人追恐御舟夜行質明至太和縣舟人景信反  
惟忠兵又潰失宮人百六十人康珪俱遁兵衛不滿百亟趨虔  
州帝慮徑入閩廣遣使詢訪命中書舍人李正民朝謁時虔州  
府庫皆空衛軍所給皆沙錢市買不售與百姓交鬪縱火肆掠  
土豪陳新率衆圍城康珪等弗能禁惟忠步將胡友自外引兵  
破新于城下帝聞罷康珪代以盧益李回諭輔臣曰朕初不識  
太后自迎至南京憂朕不甯已出今在數千里外兵馬驚擾朝  
夕慕念當亟奉迎以愜朕意復遣御營都統辛企宗帶御器械

潘永思迎歸至越帝親迓于行宮門外遍問所過守臣治狀自  
入宮微若風眩有宮人自言符咒太后驚曰吾豈復聞此語  
卽立命出之及誕辰帝置酒宮中從容語帝辨明宣仁太后誣  
枉語載弘自是事始得其正而奸臣情狀益著矣帝事太后極  
孝帷帳皆親視或得時菜必先獻然後敢嘗宣教郎范燾與忠  
厚有憾誣與太后密養欽宗于帝曰朕於太后如母子安得有  
此卽命治其罪紹興元年春患風疾帝旦暮不離左右衣弗解  
帶者連夕四月崩於行宮之西殿壽五十九遣命擇地攢殯俟  
事寧歸葬園陵詔以繼體之重制期年服凡喪祭用母后臨朝  
禮初上尊號昭慈獻烈推恩外家凡五十人殯于會稽之上皇  
村祔主廟室位在昭懷后上三年改諡昭慈聖獻素性謙抑節  
儉不許避父名上尊號有司月供祇給千緡幸南昌時斥賣私

絹三千匹充費有論忠厚直顯謨閣非所當授卽令易武階戒家人不得預聞朝政通貴近至私第謁宰執以恩澤當得官者近八十員米嘗陳請中遭權奸誣構願能善始令終天意蓋不可料云

劉氏素多才藝初爲御侍以明艷冠後庭能順意奉兩宮由美人嬖好進婉儀加封賢妃帝盛寵之自恃有勢侍中宮不循妾禮紹聖三年后朝景靈宮訖事就坐諸嬪御立侍獨婕妤背立簾下直閣陳迎兒呵之不顧后閣中皆忿冬至日復朝欽聖於隆禧宮故事惟后座朱髹金飾婕妤在他座有愠色從者爲易座輒與后等衆弗能平因傳唱皇太后出伺衆偕起或撤去婕妤所坐尋各復位婕妤不知遂仆于地懟不復朝歸而泣訴于帝內侍郝隨啓曰母以此戚戚願爲大家早生子此坐正當爲



婕妤有也乃陰造奇語以售其謗內侍劉友端爲之助竟廢孟后而代之所生子茂纔三月而夭右正言鄒浩以妃嘗與后爭寵今一廢一立殊累盛德帝大怒除名編管徽宗立冊爲元符皇后崇寧元年追冊太子諡曰獻愍明年二月甲寅尊爲太后宮名崇恩帝緣哲宗故曲加恩禮后以是頗干預外事帝與輔臣議將廢之政和二年二月卽簾鈞自縊死諡曰昭懷册葬永泰陵神主祠廟年三十五

徽宗二后皆開封人王氏德州刺史藻女元符二年歸于端邸初封順國夫人卽位冊爲皇后生欽宗及崇國公主素性恭儉方鄭王二妃尤寵巨閹安意迎合誣以闇昧命邢都侍郎周鼎卽祕獄叅驗無跡大觀二年崩年二十五初諡靜和葬裕陵之次紹興中始册廟室改諡顯恭 鄭氏父紳由直省官累封太

師樂平郡王后與王貴妃本欽聖押班徽宗爲端王每朝慈德  
宮命二人供侍及卽位遂以賜之自入宮好觀書章奏能自製  
帝愛其才崇寧初封賢妃遷貴妃素性端謹恭順承帝意遂有  
異寵多賚以詞章天下歌之政和元年冊爲皇后奏北兵多事  
國用未足合用冠服悉因舊物改製乞罷黃麾仗小駕鹵簿等  
儀從一應恩澤皆弗陳請復奏族于居中罷其樞任欽宗受禪  
尊爲太上皇后遷居寧德宮稱寧德太后從上皇幸南京金師  
退后先歸京師時議多言上皇將復辟於鎮江人情危駭用事  
者疑后歸將由端門直入禁中內侍皆勸上嚴備不從駕乃出  
迎于郊兩宮相見歡洽上皇聞之卽罷如洛之議後從幸青城  
遂不得還留于五國城凡五年崩年五十二紹興七年何蘇等  
使還始聞計高宗詔成服追諡顯肅祐主廟室以聞哀日爲忌

梓宮歸入境承之以柳納輦衣其中合掖徽宗永佑陵后既北  
還訴于粘罕曰妾有罪當行但家屬素不預朝政乞留不遣粘  
罕許之紳故得歸流寓江南上憐之詔所在尋訪賜官有近屬  
鄭藻紹興中帶御器械用祔廟恩拜隴州防禦使凡四使金歷  
官至保信軍節度使加太尉卒追封榮國公 王貴妃初封平  
昌郡君進貴妃生耶王楷王植陳王機惠淑康淑順德柔福  
冲懿帝姬政和七年薨諡懿肅

妃劉氏初出甚微入宮大幸由才人七遷至貴妃生濟陽郡王  
楫祁王模信王榛政和三年微疾帝不經意七月庚子起召幸  
已薨始大悲惻特加四諡曰明達懿文又踵溫成故事使皇后  
表請冊贈爲皇后 又有安妃本出酒家女與妃同姓劉氏養  
以爲女天資警悟解迎意合旨遂大有寵由才人進至淑妃生

建安郡王模嘉國公椅英國公懋并和福帝姬政和四年加貴妃朝夕得侍上擅愛額席嬪御爲之稀進擇其父劉宗元節度使林靈素曰爲九華玉真安妃肖其像于神霄帝君之左宣和三年薨年三十四初諡明節和文旋加冊贈爲皇后

韋氏開封人初入宮爲侍御得幸夢神投胎遂生高宗崇寧末封平昌郡君大觀初進婕妤累遷婉容欽宗內禪封爲龍德宮賢妃從上皇北遷建炎初遙尊爲宣和皇后封其父安道爲郡王官親屬三十人自此遣使不絕嘗號勸諭輔臣曰皇后春秋高朕思之不遑寧處屈已請和正爲此耳學士朱震引唐建中故事請遙尊爲皇太后而禮官吳表臣請依嘉祐治平故事俟三年喪畢然後舉行帝先降御札播告天下追封后三代俱王爵然猶未得歸期每舉戚以爲若從朕請餘皆非所問也及王

倫面言許歸后未幾蕭哲來使亦陳后將歸狀乃豫作慈壽宮

造莫將韓恕爲奉迎使十年猶未有期邇上皇太后用賀於慈

寧殿生辰歲旦皆通行賀禮洪皓在燕求得后手書遣李微持

歸帝大喜曰遣使下輩不如一書遂加微官金遣蕭毅邢具瞻

議和帝泣語養不及親邇又面語丁寧命何鑄曹勛往報謝召

至內殿語備載弘道錄鑄等至首以爲請金主猶難之曰先朝業已如

此豈可輒改助反覆再三仲帝之言金主默有允意命鑄等就

館館伴耶律紹文密傳主意許從所請洪皓聞之遣人報帝及

鑄等還具言其實遂命叅政王次翁爲奉迎使金遣其臣高居

安完顏宗賢等扈從以行后素聰明有智慮初聞許還三梓宮

恐其反覆呼役者畢集然後起攢時方暑憚行又慮有他變乃

陽稱疾須臾得黃金以犒其衆伺秋涼進發途中始無間言

十二年四月次燕山自東平舟行由清河至楚州既渡淮命太  
后第韋淵泰魯國大長公主吳國長公主迎于道駕親至臨平  
奉迎普安郡王宰執兩省三衙管軍皆從帝初見太后喜極而  
泣八月至臨安入居慈寧宮向因梓宮未還輟樂至今及太后  
壽節詔始用樂謁家廟親屬還宮幾二百人后在北方聞韓世  
忠名舟次臨平呼至簾前慰勞帝侍宮中或至夜分后論以且  
休聽朝宜早恐妨萬幾兩宮給使宜令通用不可分彼我恐佞  
人間言得易以人時皇后未立屢爲帝言帝請降手書太后曰  
我但知家事外庭非所當預將行則命承平典禮悉能記之帝  
先意承志惟恐不及或一食稍減輒不勝憂懼常戒官人曰慈  
壽已及六十惟優游無事起居適意卽壽考康寧事有所闕慎  
毋令知第白于朕十九年壽七十正月朔卽宮中行慶壽禮親

屬各遷官一等有微恙累月不出會牡丹盛開入白太后欣然步至花所留宴竟日盡歡后常苦目疾醫皇甫坦愈之二十九年太后壽八十復行慶禮親屬又進一等推及庶人年九十宗子女若貢士已上父母年八十者悉官之九月得疾上不視朝敕輔臣祈禱天地宗廟社稷赦天下減租稅俄崩于慈寧宮諡曰顯仁捐于永祜陵之西祔神主徽宗室親屬進秩復十四人授官三人太后天性節儉有司進金唾壺易用塗金宮中賜予不過三數千所得供進財帛多積于庫至以給喪葬之費然好佛老事四聖甚謹康王初出使有小妾言見四金甲人執刀劒以衛以爲 助北遷時常設祭及歸立祠西湖上

欽宗后朱氏祥符人父伯材武康軍節度使徽宗臨軒備禮冊爲皇太子迎生皇孫湛卽位立爲皇后追封父恩平郡王因從

北遷不知崩聞慶元四年正月己卯進上尊諡曰仁懷升祔廟  
室授兄孝孫右金吾衛上將軍卒贈開府儀同三司孝章永慶  
軍承宣使卒贈昭化軍節度使

弘簡錄卷一百七十一

終



弘簡錄卷一百七十二

明刑部員外郎仁和弘齊邵經邦學

皇清翰林院侍講學士四世孫遠平校閱

后妃 宋七之二

高宗后

邢氏

妃

潘氏

孝宗后

郭氏

光宗后

妃黃氏

寧宗后

韓氏

理宗后

度宗后

妃楊氏

高宗二后邢氏祥符人父煥外戚有傳初聘居康邸封嘉國夫人康王出使夫人留居蔣衍宅從三宮北遷上皇遣曹助歸夫人脫所御金環使內侍持付助曰幸爲吾白大王願如此環得早相見也王憐之及卽位遙冊爲皇后官親屬二十五人紹興九年崩于五國城年三十四金人秘之上爲虛中宮以待者十

八年追太后回鑾始得崩聞輟朝行服諡曰懿節神主別廟紹興十二年八月梓宮至撰于聖獻太后梓宮之西北淳熙末改諡懿節神高宗廟 吳氏開封人父近武翼郎累贈太師追封吳王后年十四由康邸入宮卽位常戎服以待左右從幸四明衛士謀爲變問帝所在給之以免帝航海有魚躍入御舟后曰此白魚之祥也帝悅封和義郡夫人還進才人博習書史兼善翰墨由是寵遇日至遷婉儀尋封貴妃邢后崩聞至宰臣秦檜等累表請立中宮紹興十三年立爲皇后帝御文德殿授冊后卽穆清殿廷受之追王三代親屬官者三十五人顯仁性嚴肅后身承起居順適其意甚愛之嘗繪古列女圖置座右爲鑒又取詩序之義扁堂曰賢志會張賢妃薨后撫視普安常以爲天日之表贊帝決意立之旣受禪稱太上皇后遷居德壽宮上尊

號曰壽聖月朔朝上皇畢入見后如宮中儀乾道七年加號壽  
聖明慈淳熙二年上皇行慶壽禮復加壽聖齊明廣慈之號十  
年壽七十親屬推恩有差十二年加尊號曰備德上皇崩遺詔  
改稱皇太后帝歡迎還大內后以上皇几筵在德壽宮不忍去  
因名所御殿曰慈福居焉光宗卽位更號壽聖皇太后以壽皇  
太后嘗勸帝宜崇尙舊臣紹熙四年壽八十奉冊禮加尊號曰  
隆慈備福五年正月復率羣臣行慶壽禮嘉王侍側勉以讀書  
辨邪正立綱常爲先孝宗崩正號太皇太后時光宗有疾不能  
執喪宰臣請垂簾主喪事后不可已而請如唐肅宗故事羣臣  
發喪太極殿后成服禁中代行祭奠禮許之尋用趙汝愚請於  
梓宮前垂簾宣光宗手詔立皇子嘉王爲皇帝翼日撤簾慶元  
元年加號光祐遷居重華宮後聞汝愚以謫死侂冑私人汪義

端日汝愚爲李林甫后大以爲非慶元三年十月寢疾禱于天地宗廟社稷大赦天下十一月二日崩年八十三遺詔太上皇帝疾未瘳宜於宮中承重皇帝服齊衰五月以日易月詔乃服非年喪謚曰顯聖慈烈攢祔永思陵

妃潘氏張氏俱開封人潘父永壽直翰林醫官贈太子太師妃由康邸進生元懿太子卽位立爲賢妃太子薨從隆祐太后于江西與太后同御農夫而行得至虔州踰年亦薨張氏建炎初爲才人有寵進婕妤時養宗子伯琮于禁中輔臣問誰可付託者帝意在婕妤因命母之尊遷婉儀卒上爲輟朝贈賢妃弟萃閣門宣贊舍人遷秩二階

孝宗三后郭氏祥符人章穆皇后六世孫祖直卿奉直大夫孝宗爲普安郡王納之封咸寧郡夫人生光宗及莊文太子魏王

愷邵王恪紹興二十六年薨年二十一封淑國夫人東宮建昭  
皇太子妃受禪追冊皇后謚安穆營阜陵寧宗改成穆祔廟父  
城累官昭慶軍承宣使追封榮王孝宗待郭氏恩禮彌厚然不  
假外戚官爵后弟師禹師元官不過承宣使光宗內禪除師禹  
節度使進少保寧宗進少傅加太保封廣陵郡王

夏氏袁州宜春人曾祖令吉爲吉水簿父協生后時有異光穿  
室竒之及長入宮爲憲聖閣中侍御普安夫人薨太后以賜王  
封齊安郡夫人卽位進賢妃奉上帝命立爲皇后乾道二年謁  
太廟親屬推恩十一人三年崩謚安恭寧宗改成恭權攢于臨  
安修吉寺 謝氏丹陽人幼孤鞠於外家冒姓翟氏及長選入

憲聖宮以賜普安郡王封咸安郡夫人卽位進婉容至貴妃淳  
熙三年侍帝過德壽宮上皇諭以中宮虛位遣張去爲傳旨立

爲皇后復姓謝氏推恩親屬十人光宗受禪上尊號曰壽成孝  
宗崩尊爲皇太后慶元初加號惠聖嘉泰二年加慈祐太皇太  
后作壽慈宮請還內九月己酉帝朝于壽慈宮開禧三年崩謚  
成肅攢祔永阜陵后性慈儉減大官膳羊服澣濯衣數年不易  
常戒弟淵崇謙抑遠驕侈帝雖在位久後宮罕所寵幸止蔡李  
二貴妃餘無著聞者

光宗后李氏相州安陽人父道外戚有傳生時有黑鳳集營前  
道心異之小字鳳娘聞皇甫坦善相令出拜之坦驚不敢受曰  
女當母天下因言於高宗聘爲恭王妃封榮國夫人進定國生  
嘉王擴光宗在東宮冊爲妃性妬悍嘗詣兩宮訴太子左右高  
宗不懌語吳后曰是將種吾爲坦所誤孝宗亦屢訓后宜以皇  
太后爲法及禪位冊爲皇后值帝得心疾壽皇購得良藥欲因

帝至宮親投宦者乘間語后曰太上合藥一大丸俟宮車過卽投之萬有不虞柰宗社何后覘藥實有心術之尚未發頃之內宴后請立嘉王爲太子壽皇未許后忿曰妾六禮所聘嘉王妻親生何爲不可壽皇怒后退泣訴于帝言壽皇有廢嘉王意帝惑其言退廢期謁帝嘗浣手宮人奉盥視其手白悅之他日后遣人送食于帝啓盒視則宮人兩手也南郊帝宿齋宮后殺黃貴妃以暴卒聞至夕風雨大作黃壇燭盡滅不克成禮帝疾由是增劇不能視朝政事多決於后益肆驕侈追封三代爲王家廟逾制衛兵多於太廟歸謁之日推恩親屬二十六人使臣一百七十二人補官下至門客中興以來所未嘗有時帝久不朝重華中外疑駭紹熙四年九月重明節宰執侍從臺諫連章請帝給事中謝深甫懇切言太上春秋高父子至親天理昭然其

誠心愛陛下。亦猶陛下之愛嘉王也。帝感悟。趣命駕往朝。百官班列以俟。已出至御屏後。后挽留曰。天寒。官家且飲酒。百僚侍衛相顧莫敢言。舍人陳傅良引帝裾請毋入。因至屏後。后叱曰。此何地。秀才至此。欲斫頭耶。傅良下殿慟哭。后使人問以何理。對曰。子諫父不聽。則號泣而隨之。后益怒。遂傳旨罷還官。後太上崩。竟不能執喪。寧宗立。尊爲太上皇后。上尊號曰壽仁慶元六年六月。違豫肆赦。崩。壽五十六。諡曰慈懿。權攢于南山修吉寺。祔主太廟。黃貴妃初封和義郡夫人。上皇以賜。遂專寵。后怒之。紹熙二年冬十一月死。

寧宗二后韓氏琦六世孫父同卿外戚有傳。初與姊俱選入宮。后能順適。兩宮意遂歸平陽郡。邸封新安郡夫人。進崇國夫人。王登祚冊爲皇后。慶元六年崩。諡恭淑。權攢南山廣教寺。祔主。



太廟 楊氏會稽人自少以姿選慶元元年封平樂夫人三年  
進婕妤五年進婉儀六年正月己亥子坦生加封貴妃坦至八  
月而天先是后與曹美人俱有寵自韓后崩中官未有所屬佞  
冑見后任權術而曹美人性柔順勸帝立曹帝以后頗涉書史  
知古今性復機警竟立之族兄次山客王夢龍知其謀密以告  
后后銜之因與次山謀誅佞冑使皇子詢入奏帝不答后從傍  
贊之甚力亦不答恐事泄乃令次山擇廷臣可任者共圖佞冑  
史彌遠素與有隙欣然奉命轉告參政錢象祖禮部尙書衛涇  
著作郎王居安右司郎官張鑑皆預其謀密遣中統制夏震槌  
殺之帝初不知自此彌遠日貴用事后親信之及皇子詢薨國  
嗣未定養宗室子竑爲皇子與彌遠不相協陰蓄異志欲立他  
宗子昀帝大漸日彌遠遣后兄子谷與石人白廢立事后不可

曰皇子先帝所立豈敢擅變是夜凡七往反后終不聽谷等拜  
泣曰今已名昀入宮內外軍民又皆歸心苟不從禍變立至  
楊氏且無噍類矣后初不知默然良久名昀入拊其背曰汝今  
爲吾子矣遂矯詔廢竑爲濟王立昀爲子卽皇帝位是爲理宗  
尊后曰皇太后同聽政以五月十六生日爲壽慶節名所居殿  
曰慈明寶慶三年上尊號曰壽明紹定元年復加慈睿四年壽  
七十五帝率百官朝慈明殿行慶壽禮加尊號壽明仁福慈睿  
大赦賜宰執彌遠等爵秩有差不豫禱于天地宗廟社稷宮觀  
赦天下明年崩諡曰恭聖仁烈

理宗后謝氏諱道清丞相深甫孫女帝當立后楊太后德深甫  
有援立功特命選之初封通議郡夫人寶慶三年九月進貴妃  
十二月冊爲皇后時賈貴妃專寵閹貴妃又以色進后處之裕

如畧不介懷太后賢之帝體過益加開慶初元兵渡江議遷都  
平江后諫曰恐搖動民心乃止理宗崩度宗立尊爲皇太后加  
上尊號壽和聖福立生日爲壽崇節進封三代父魏王祖及曾  
祖景之皆魯王后兄奕昌臨海郡王卒贈少保諡莊憲后姪堂  
聖壁原在遠皆授節度使宗姻奕修奕實郭自中黃興在及高  
平郡夫人謝氏等各封資進秩有差度宗崩恭帝立尊爲太皇  
太后年老且疾大臣屢請垂簾聽政彊之乃許以不能御正衙  
暫就慈元殿殿時兵興費繁痛自裁節汰慈元殿提舉以下官  
省冗索錢緡削賈似道官箴之揭榜朝堂不許百官擅進言天  
命未改國法尙存凡在官守與轉一資負國逃者覺察以聞德  
祐元年六月朔日食旣削已聖福尊號以應天變時國事以去  
張世傑兵敗焦山陳宜中棄官去累召不至后以書遺其母又

親爲書召夏貴等言吾母子不足念獨不報先帝德乎然罕有  
至者是月元兵破常州遣陸秀夫等請和不從宜中率公卿請  
遷都明日當啓行宮車已駕日且暮而宜中不至太后怒而止  
明年正月泣語宜中使軍中日苟存社稷稱臣非所較也宜中  
以爲難未幾元兵薄皋亭山宜中宵遁文武百官多引去二月  
辛丑大軍駐錢塘降封壽春郡夫人以疾留杭終年七十四  
度宗后全氏會稽人知岳州昭孫女理宗母慈憲夫人姪孫女  
也性慈順畧涉書史開慶初忠王議婚時相丁大全議京尹顧  
鼎女未定大全收大臣言全女嘗侍其父往返江湖備嘗艱險  
其處貴富必能盡警戒相成之道理宗亦以慈憲故詔擇日進  
見入宮問其父昔在寶祐間沒於王事毋念之令人可哀對曰  
妾父可念淮湖之民尤可念也帝異其言辭甚令因語大臣宜

配家嫡以承祭祀景定二年十二月詔封永嘉郡夫人十二月冊爲皇太子妃帝訓皇太子夫婦之道王化所基男女正位天地大義平日所講修身齊家之道當真履實踐勿爲口耳之學宜付史館永爲世程生恭帝咸淳三年正月冊爲皇后追贈三代賜家廟第宅弟清夫大中大夫儒科發身乞換武班特授清遠軍承宣使庭輝以下十五人各轉一官永堅必樵以下十七人補承信郎度宗崩恭帝立冊爲皇太后進清夫昭信軍謝屋保康軍謝至保寧軍皆節度使謝堂檢校少師爲兩淮鎮撫使與永堅並加檢校少保宋亡從恭帝入朝于燕京後爲正智寺尼而終

妃楊氏初選入宮爲美人咸淳二年進封淑妃親屬楊幼節以下百三十四人推恩進秩生建國公昱修容俞氏生昺恭帝降

皇走溫州又奔福州衆推爲帝妃爲太后封曷衛王大軍圍昱海上昱卒時代立曷復投海死妃聞之大慟曰我聞關忍死以至于此者正爲趙氏一塊肉祭祀尙有可望爾今天命至此夫復何言遂赴海死

公主附

太祖女

魏魯陳等主

太宗女

徐楊鄭荆等主

仁宗女

周素堯燕等主

英宗女

楚舒韓等主

神宗女

周唐潭慶等主

哲宗女

陳國吳等主

徽宗女

嘉德等帝姬

理宗女

嗣漢等主

太祖女魏國大長公主開寶三年封昭慶公主下嫁王審琦子永衍賜第景龍門外祥符元年薨諡賢肅承衍字希甫幼端謹善騎射曉音律頗涉藝學好吟咏署父牙職補內殿都知授右衛將軍駙馬都尉領恩州刺史加防禦使太平興國初遷應州

觀察使累檢校太保彰國軍節度使出知天雄軍時契丹擾鎮陽候騎至冀州隣境戒嚴承行鎮以安靜人賴以安爲貝冀都部署換節永清護國二軍真宗改河中尹加檢校太尉卒年五十二贈中書令給鹵簿葬謚恭肅子世安世隆世雄世融

魯國大長公主開寶五年封延慶公主下嫁石守信子保吉祥符二年薨謚賢靖保古字祐之陰補天平軍衙內都指揮使開寶四年召見賜襲衣玉帶金鞍勒馬拜左衛將軍駙馬都尉領愛州刺史本州防禦朔州觀察使父喪起復授威塞軍節度使雍熙三年出知河陽人名兼兵馬都部署改橫海安國二鎮真宗加檢校太尉保平軍節度車駕北巡爲河北諸路行營都部署屯定州景德初求使相李沆執意不許沆薨後始改武寧軍節度使同平章事幸澶淵爲駕前東西面都排陣使軍于北門

外東封攝司徒登壇奉俎加檢校太師還鎮卒年五十七贈中書令謚莊武保吉姿貌瓌碩有武幹性驕倨所至峻暴好殺待屬吏不以禮子貽孫崇儀使帶御器械孝孫西京左藏庫使陳國大長公主初封永慶公主嫁魏仁溥子咸信景祐三年薨謚貞惠咸信字國寶太祖居潛昭憲太后嘗至仁溥第咸信方幼侍母側儼如成人人奇愛之欲結姻好開寶中因成太后之意選授右衛將軍駙馬都尉真宗北巡以爲貝冀行營都部署卒年六十九贈中書令生子賜名昭亮字克明初授如京副使進東上閤門使上言閤門儀制未備詔與陳彭年張知白同加詳定遂與彭年欵昵嘗稱其材能居官務職察多遣人偵伺僚輩人以此少之餘慶供備庫副使

太宗女徐國大長公主太平興國九年封蔡國公主下嫁吳廷



祚子元晟字君華初授左衛將軍駙馬都尉領愛州刺史本州團練使雍熙三年表求試郡命知鄆州尋改河陽領鄆州觀察使主戾召還淳化元年主薨復任五年秋霖河溢城壘將壞元晟躬涉泥濘督工補塞以舟楫濟民設餅餌食之所部獲安真宗換安州觀察使知澶州運使劉錫上其治狀詔書嘉獎遷寧國軍留後知定州值王超王繼忠與遼人戰領兵踰唐河元晟急發州兵護河橋旣而敵果來乘見有兵引去歲旱虔禱澍雨沾洽吏民詣闕表請立碑景德三年代歸授武勝軍節度使命修諸陵分領澤潞晉絳磁隰威勝七州軍戎事東封加檢校太傅知徐州祀汾陰改領山南東道被疾卒年五十帝甚悼惜贈中書令謚忠惠元晟性謹讓有憂民心待賓佐以禮喜讀春秋左氏聲色狗馬一不介意族屬至多薦其堪祿仕者自餘親舊

孤貧皆均俸贍之公主亦有德行時乳媪入參宮禁慮其去後  
妾有請託自上拒之真宗深所嘉嘆獨稱其賢諡曰英惠授子  
守禮六宅使累澄州刺史和州防禦使守嚴守良皆內殿崇班  
守讓閤門祇候天禧中又錄孫承嗣承緒並爲殿直

楊國大長公主至道三年封宣慈長公主下嫁柴禹錫子宗慶  
賜第普寧坊帝命主以婦禮謁禹錫固辭不許明道二年薨諡  
和靖宗慶字天祐初授右衛將軍駙馬都尉領恩州刺史真拜  
康州防禦使改復州從祀汾陰爲行宮四面都巡檢使進泉州  
觀察武勝軍留後彰德軍節度使仁宗徙靜難永清二軍拜同  
中書門下平章事又徙節武成軍出知陝州判鄭州以縱部曲  
擾民召還奉朝請卒贈中書令諡榮密

鄭國公主至道三年初封賢懿長公主下嫁王溥孫從子行收

名貽永景德元年薨諡懿順景祐三年追封雍國大長公主貽  
永字季長性清慎寡言頗通書不好聲技咸平中授右衛將軍  
駙馬都尉從封泰山領高州刺史轉右監門衛大將軍獎州團  
練使外補知單州真宗戒以和衆靜治卿所當先真拜洛州團  
練懷州防禦使知壇定二州徙成德軍奏曹汭之變遷耀州歷  
彰化武定軍觀察留後安德保寧等軍節度使知天雄軍移鄆  
州鄆自咸平中徙城故治爲通衢介梁山春夏多水患貽永相  
度地勢築東西道三十餘里民甚便之復移定州及成德軍康  
定初召同知樞密院事慶曆五年改副使加宣徽南院使進樞  
密使久之拜同中書門下平章事加兼侍中徙節鎮海彰德累  
疾求罷遣醫診視稍間召入賜五日一朝命其子西上閤門使  
道卿扶掖升殿仍許休殿側至和初拜尚書右僕射皆故事所

無在樞密十五年能遠權勢迄無過失性清謹歸第杜門謝客人稱謙靜終檢校太師景靈宮使贈太師中書令諡康靖

荆國長公主幼善女功及長性儉約號知禮真宗改封萬壽公主下嫁李崇矩孫遵勗賜第永寧里所居堂堦及瓦甃多爲鸞鳳主悉令鑿去服有龍飾悉屏藏之帝聞歎美後遵勗守許州得暴疾主不待報率從者竟往居喪哀毀循禮服除不御華麗常曲燕帝親爲簪花辭曰誓不爲此久矣兼善筆札喜圖史能爲歌詩誠諸子守忠義無恃吾以速悔尤目病喪明帝與后妃以下皆至第候問帝親爲舐之曰先帝伯仲之籍十有四人今獨存大主倘疾可移於朕亦所不避也臨歿隱几冲淡自若遺誠諸子遵父遺命無藏金玉以葬堯年六十四帝臨奠五輟視朝追封齊國大長公主諡獻穆遵勗字公武生數歲相者謂當

以姻貴少學騎射馳冰雪間焉逸墜崖下衆謂其救徐起亡恙  
及長好文辭舉進士祥符間召對便殿授左龍武將軍駙馬都  
尉領澄州刺史坐私主乳母謫均州團練踰年起爲太子左衛  
率府副率真拜康州團練使父繼昌守涇州暴感風眩遵勗不  
俟命馳省帝遣使乘驛赴之還遷澤州防禦宣州觀察使求試  
郡出知澶州賜宴長春殿會河溢將壞浮梁督工治隄七日而  
成授昭德軍觀察留後寧國軍節度使徙鎮國軍知許州校按  
水軍多不練習劾去十八嘗以疾援唐韋嗣立故事求山林號  
詔不許章獻臨朝問以外事不答固問之曰人言上旣冠宜以  
時還其政太后曰我非戀此但帝少內侍多恐未能制之爾因  
進三說五事以論時政太后乳母晉國林夫人多干外事太后  
崩遵勗密請置之別院出入伺察以厭服衆論其居第園池冠

京城嗜奇石構堂引水環以佳木延名士大夫與宴樂師楊億爲文億卒爲制服與劉筠友善存恤其後通釋氏學將死與浮圖楚圓爲偈頌卒贈中書令諡和文有開宴集二十卷外館芳題七卷

仁宗女周陳國大長公主初封福康公主幼警慧性純孝帝嘗不豫主侍左右徒跣顧天乞以身代帝隆愛之帝念章懿不及享天下養因擇尚其兄子李瑋以爲駙馬都尉瑋質朴陋與主積不相能所生母又忤主意嘗中夜扣皇城門入訴願自還宮瑋皇懼自劾削金後數年復不協詔落駙馬出知衛州反主禁中司馬光言陛下追念慈恩今乃使母子離析家事零落獨無雨露之感乎且瑋旣出主安得無罪仁宗悟降主沂國復伉儷如初仍復都尉積官濮州團練安州觀察使復因奉主亡狀貶

彬州團練使陳州安置遇赦還京治平四年進主楚國薨年三十三神宗命諡莊孝瑋後官建武軍節度使檢校太師卒哲宗臨奠哭之贈太師中書令

秦魯國大長公主嘉祐五年初封慶壽公主進惠國治平四年進魯國下嫁吳越忠懿王曾孫錢景臻爲右領軍衛大將軍徽宗朝進秦魏兩國政和三年更封令德景行大長帝姬以先朝女金人不知留于汴建炎初至揚州朔謁復避地之閩紹興三年仍還會稽入見因留居焉時以行尊年高帝甚敬之每入見必先揖三子忱愜愷俱非王出王獨厚于忱先是靖康中戚里例納節及是得請授忱瀘川節度使久之又請優賜推恩上重違之加開府儀同三司上因戒曰長主壽考如此乃仁宗皇帝深仁厚澤所鍾待遇諸子宜法先朝用心均一主戚服薨年八

十穀朝五日駕幸臨奠諡曰賢穆加諡明懿封景臻會稽郡王  
忱字伯誠神宗賜名帝嘗諭景臻主賢宜有後爲擇嘉配乃  
娶晁迥外孫唐介孫女忱從二家遊又伯父勰在翰林因得識  
一時名卿哲宗愛之常令侍左右御書忠孝之家四字賜之紹  
興十五年長主終喪除少保封榮國公卒年八十贈太師愜官  
至太尉開府儀同三司

克國大長公主嘉祐六年初封永壽公主熙寧九年改封魯國  
長公主下嫁曹彬曾孫詩爲左領軍大將軍主性儉節居第池  
臺苑固一無增飾主生日曹族將盛具爲壽主言時方大旱土  
損膳徹樂吾何心能安悉命屏之元豐六年薨年二十四諡賢  
懿

燕舒國大長公主嘉祐六年初封寶壽公主治平二年進燕國



長公主下嫁開州團練使郭戲卿政和二年薨諡懿穆

英宗女魏楚國大長公主嘉祐八年初封德寧公主治平三年進封徐國長公主下嫁王審琦曾孫師約元豐八年薨追封燕國大長公主諡惠和師約字君授少習舉業英宗嘗求儒生爲姪命宰相名師約因獻所爲文賜對選爲駙馬都尉授左衛將軍賜玉帶又賜九經筆硯勉之進學神宗拜嘉州刺史遷成州團練使始令越例同管當三班院試其才遷汝州防禦使考績轉晉州觀察使哲宗遷鎮安軍節度觀察留後上書宣仁后元符初以越職褫其秩徽宗復保平軍留後樞密都承旨卒年五十九主生子殊至閬州觀察使

魏國大長公主嘉祐八年封寶安公主神宗立進舒國長公主下嫁王全斌五世孫詵字晉卿能詩善書授左衛將軍駙馬都

尉詵母盧氏寡居主處之近舍日致膳羞盧病自和湯劑以進  
帝厚於姊妹居第池藥服甌極其華縵主以不得侍宣仁於寶  
慈宮居常悵然間遇旱暵亦從帝降損以禱曰我奉賜皆出公  
上固應同其休戚帝居慈聖喪毀甚主云與上同體視此復何  
聊賴亦散遣歌舞三十輩平居不妬忌詵得自恣常貶官帝命  
復之以尉主意元豐三年疾篤太后臨問慟哭帝繼至自爲診  
脈親持粥飲之主強爲盡食問所須但謝帝復詵官薨年三十  
主好讀古文章喜筆札賜恤族黨中外惜之輟朝五日累改秦  
荆魏三國主諡賢惠詵後官至留後

韓國大長公主始封壽康公主改祈衛兩國熙寧元年選尚張  
敦禮授左衛將軍駙馬都尉俄遷密州觀察使元祐初上疏言  
變法附會之害進武勝軍留後章惇以爲詆毀先烈譽司馬光

奪留後授左千牛衛大將軍勒止朝參徽宗立復和州防禦使  
進保信軍留後寧遠軍節度使徙雄武卒贈開府儀同三司主  
宣和五年薨加秦越楚三國主

神宗女周國長公主母欽聖太后也主生而警悟羈卯習暗婉  
如成人年十二卒 唐國長公主始封淑壽公主神宗念韓琦  
功德欲與爲婚後哲宗緣帝意以主降其子嘉彥加瀛海軍承  
宣使主歷封溫曹冀雍越燕六國政和六年薨 潭國長公主  
母曰宋貴妃始封康國公主紹聖四年下嫁王遇大觀二年薨  
歷韓魯陳邾四國諡曰賢孝 徐國長公主始封慶國公主進  
益冀蜀徐四國年及笄猶處聖瑞宮侍母欽成后疾晝夜不暫  
去藥餌非干和弗以進迨疾革號慟屢絕左右不忍視崇寧三  
年下嫁潘美曾孫意事姑修婦道潘故大族夫黨數千百人賓

接皆盡禮無中外言志向冲淡服玩不爲紛華歲時簡嬉遊十年間惟一適西池而已政和五年薨年三十一追封賢靜長帝姬

哲宗女陳國公主始封德康公主大觀四年下嫁石端禮歷瀛滎陳三國政和七年薨

吳國長公主始封康懿出降藩正夫常助時相紹述靖康中亦以先朝女得留建炎初避地至婺州入見高宗奏祖宗以來駙馬皆除使相今正夫歷事四朝在汴京曾建議迎陛下至杭又言禁衛未集預宜防變乞除開府不許八年再入見留官中三日值煩暑上每正衣冠對之飲食時趙鼎當國頗抑正夫鼎去位始除開府儀同三司檢校少傅封和國公卒贈太傅隆興二年主薨諡康懿子溫卿長卿端卿並授承宣使清卿容州觀察

使墨卿才卿團練使其盛如此

徽宗女二十四早亡十四未嫁十政和五年改公主號爲帝姬  
國號易以美名曰嘉德帝姬下嫁曹寅榮德帝姬下嫁曹晟安  
德帝姬下嫁宋邦光茂德帝姬下嫁蔡條崇德帝姬下嫁曹湜  
成德帝姬下嫁向子房洵德帝姬下嫁田丕顯德帝姬下嫁劉  
文彥順德帝姬下嫁向子展俱授左衛將軍駙馬都尉後皆北  
遷獨恭福帝姬生纔周晬不行後亦薨其在五國城柔德帝姬  
適徐還紹興十一年薨後有開封尼李靜善貌似柔福卽自冒  
稱上遣內使馮益等驗視以爲真遂封福國長公主適永州防  
禦使高世榮至顯仁太后歸始知其妄伏誅追封和國長公主  
榮德至燕京駙馬卒改適習古國王紹興中有商人妻易氏在  
劉超軍中亦冒稱之鎮撫使解潛送至行在遣內夫人辨驗其

詐付大理獄論死惟安德遣女一人後適嗣秀王伯圭封秦國夫人

高孝光寧四朝女皆早亡惟理宗一女周漢國公主母賈貴妃有寵帝惜其早薨甚鍾愛之初封端國改昇國開慶初主年及笄詔議選尚丁大全欲用新進士爲駙馬因命考官竄周震炎第一倡爲太平狀元之說以嬖帝震炎草茅士年幾三十恭謝日公主於內窺之不悅事遂寢帝以楊太后擁立功乃選太后姪孫鎮尚主擢右領軍衛將軍駙馬都尉帝欲時時見之爲起第嘉會門之安濟橋第成內侍董宋臣李忠輔皆進官飛樓閣道密邇宮苑帝常御小輦從宮人過主第犒賞有差授鎮宜州觀察使賜玉帶宗族楊蕃孫官兩轉楊鐸楊鑑官一轉並直秘閣餘娣奴皆推恩加封寵異甚渥薨年二十二諡端孝鎮官至

廣遠軍承宣使加節度使

錦卷一百七十二

錦卷一百七十二

六

附公主宋一

弘簡錄卷一百七十三

明刑部員外郎仁和弘齋邵經邦學

皇清翰林院侍講學士四世孫遠平校閱

系屬 宋八之一

太祖弟廷美

子德素 德欽 德隆 德興 德雍 德鈺  
孫叔近 彦傑 彦逾 德文 德恩 德存

子德昭

孫惟正 惟吉 惟固 惟忠 惟和  
令時 令旺 令應 令鈴 令景  
子德 子直 子崧 子棟 子景  
子祇 師昇 希罕 希言 與恩  
孫惟敘 仁憲 惟能 子傅 伯主  
師夔 師拱 師岳 伯玖

次德芳

太祖兄光濟弟光贊俱早亡後追封光濟邕王改曹王光贊夔  
王改岐王廷美最幼初名光美字文化建隆初授嘉州防禦使  
明年遷興元尹山南西道節度使乾德二年加同中書門下平



章事開寶六年檢校太保侍中京兆尹永興軍節度使太宗卽位爲開封尹加中書令封齊王子並稱皇子女稱皇女尋檢校太師扈駕親征太原久乃論功進封秦王太平興國五年親征契丹命留守東京會有告其驕恣將有陰謀竊發者帝不忍暴其事罷尹開封徙爲西京留守行後賞告密功以王通判河南府間矩判留守事柴禹錫楊守一皆遷官又併坐交通及嘗受宴偏者落左衛將軍樞密承旨陳從龍爲皇城使右衛將軍劉知信弓箭庫使惠延真商州長史并責禁軍校皇甫繼明王榮等削籍配流及趙普再相又奏盧多遜交通事言已實與昭憲顧命後爲權倖所沮在先朝時已嘗自慙上乃於宮中訪普前所上章并發金匱誓書因訪以傳國之意普曰太祖已誤陛下豈容再誤邪於是廷美遂得罪會多遜事發下御史捕繫中書

守堂官趙白坐與王府吏樊德明遊處因之交結秦王爲多遜  
往來傳語言皆指斥官車又秦府孔目閻密驕橫不法小吏王  
繼勲尤親信王嘗使訪求聲妓怙勢贓污趙懷祿弟廷俊爲軍  
器庫使王私召與語閻懷忠爲王請錢俶求犀玉帶金酒器又  
遣齋銀盃錦絳羊酒賜伊妻父御前忠佐馬軍都頭潘潁至是  
皆伏誅勒廷美歸私弟改正王男女名仍稱皇侄女去公主號  
降駙馬韓崇業爲右千牛衛率府率並發遣西京居住貶秦府  
官屬閻矩孫嶼爲涪融二州司戶叅軍普復以謫居西洛非便  
令知開封李符上言王不悔過乞徙遠郡以防他變詔降爲涪  
陵縣公房州安置削妻張氏楚國夫人諸子悉從普又恐符言  
泄坐他事流死春州命崇儀使閻彥進知房州御史袁廓通判  
州事伺察秦王各賜白金三百兩自此憂悸成疾雍熙元年卒

年三十八追封陪王諡曰悼上對宰相曰廷美自少剛愎長益凶惡朕以同氣至親不忍寘之於法俾居房陵冀其思過方欲推恩遽茲殞逝痛傷奈何爲發哀成服其母陳國夫人耿氏亦薨上又對侍臣言陳國卽朕乳母後嫁趙氏生廷俊朕令屬韃左右輒漏泄禁中事於廷美邇者西池水心殿成橋梁未備朕將泛舟以往廷美與左右謀欲以此時竊發不果卽詐稱疾俟朕臨省因復爲變往事如此朕不欲暴揚言已愴然昉等對曰涪陵悖逆天下共聞若此事非陛下親示臣等何由知之真宗立與妻追復官封咸平二年詔擇地改葬汝州梁縣之新豐鄉仁宗贈太師尚書令徽宗改封魏王子十人 德恭字復禮初以皇子出閣授貴州防禦使免官徙房陵後授峯州刺史德隆澧州刺史雍熙中詔德恭爲左武衛大將軍封安定郡侯判

濟州德隆爲右武衛大將軍長寧郡侯判沂州令高品衛紹欽  
送諸弟皆隨赴泊所常俸外歲給錢三百萬命起居舍人韓檢  
右補闕劉蒙叟分任二州通判諭以盡誠裨贊苟有闕失止罪  
爾等端拱元年進封德恭安定郡公改左驍衛左神武大將軍  
真宗改樂平郡公判虢州遷勝州團練衛州防禦使卒年四十  
五贈保信軍節度使追封中國公明道二年追封高密郡王諡  
慈惠二子長承慶次承壽承慶父病刲股官至和州團練使卒  
贈武信軍節度使循國公子六人克繼善楷書尤工篆隸訓子  
弟力學登科者十有二人嘗進所集廣韻字源仁宗稱善終定  
武軍節度觀察留後贈開府儀同三司建國公諡章靖承壽終  
南作坊使贈德州刺史武當侯子四人克已曉音律書學虞世  
南嘗作樂曲并獻雅樂圖侍宴大清樓賜器加等終右千牛衛

大將軍贈深州防禦使饒陽侯克巳子叔韶字君和勤於爲學  
仁宗命臨真宗御書選第一皇祐初進所爲文召試學士院賜  
及第自太子右監門率府副率遷右領軍衛將軍入謝命坐賜  
茶并賜九經論曰宗子好學者多若爾者鮮遷右屯衛大將軍  
至和中求試煩劇領賀州刺史終和州防禦使贈鎮東軍節度  
觀察留後會稽郡公克修字子莊仁宗爲皇子侍學禁中待遇  
殊厚授右神武軍大將軍成州團練使早卒贈同州觀察使馮  
翊侯克脩子叔克藏書萬卷撫視異母弟叔玕誨敎成人又請  
封其繼母遂爲定制卒官唐州防禦贈崇信軍節度使尹國公  
諡孝齊子九人登科者三撫之正任刺史遺表祈任子如外官  
法詔從之自此宗室正任始有遺恩 德隆字日新卒官沂州  
守年二十三贈寧遠軍節度使追封臨沂郡公天禧三年加贈

崇信軍節度使同平章事廣平郡王子承訓官至順州刺史卒  
贈深州團練使 德彛字可久自幼太祖鞠於宮中長授右千  
牛衛大將軍封長寧郡侯年十九代德隆判沂州飛蝗入境責  
躬引咎齋戒致禱蝗多自殪辨儒生乙恕寬進封郡公淳化四  
年爲右監門衛遷左武衛二大將軍改判廣平部民詣闕乞留  
詔嘉獎真宗召還命判滁州咸平中遷累徐州刺史保信軍節  
度觀察留後卒年四十九上臨奠廢朝贈昭信軍節度使追封  
信都郡王諡安簡明道二年改封潁川郡王子承矩終莊宅使  
贈博州刺史承勗至供奉官贈六宅副使承範承拱並西京作  
坊使承衍內殿崇班承錫供奉官 德雍字仲達淳化初授右  
驍衛將軍歷右羽林龍武二將軍累遷蔡州觀察使咸寧郡公  
終天平軍節度觀察留後贈宣德軍節度使同中書門下平章

事謚康簡明道中追封廣陵郡王子承亮襲封昌國公神宗拜  
感德軍節度使改封秦國公奉祀堯贈樂平郡王謚恭靜子克  
渝嗣卒子叔牙嗣承睦終左領軍衛大將軍彭州團練度州觀  
察使南康侯 德鈞字子正性和雅善書翰好爲篇什淳化初  
拜右武衛將軍四遷至右衛將軍景德二年加右監門衛大將  
軍卒贈河州觀察使鄖國公子承簡襲封徐國公官至保康軍  
留後贈彰化軍節度使安定郡王謚和懿承緒供奉官承偉承  
雅承裔承鑑承勛並西京作坊使承裕禮賓副使承翊內殿崇  
班承幹終懷州防禦使贈保靜軍節度使蕭國公子克敦父子  
以經術文學名于宗藩宗正薦召試中選元豐間又集父遺文  
以進神宗賜詔獎諭追封承幹爲東平王克敦終宣州觀察使  
贈開府儀同三司和國公 德欽字丕從淳化元年授右屯衛

將軍四遷右羽林將軍卒年三十一贈雲州觀察使追封雲中  
侯子承遵西京作坊使 德潤字溫玉頗好學善爲詩淳化元  
年授右領軍衛將軍四遷右羽林大將軍卒年三十九贈應州  
觀察使追封金城侯 德文字子砥淳化初授右監門衛將軍  
累遷滑州觀察使馮翊郡公少好學刻勵如諸生手抄經史百  
家工爲辭章其宗呼爲五秀才封泰山祀汾陰幸亳皆奏賦頌  
帝每賜詩輒令屬和特命楊億與相師友億卒悼以詩十章天  
聖中遷橫海軍節度觀察留後歷昭武感德武勝三軍節度使  
加同中書門下平章事仁宗以德文大父行且賢稱爲五相公  
不名慶曆四年進封東平郡王加兼侍中雖老嗜學不倦有疾  
上臨視親調藥飲薨年七十二駕往臨哭贈太尉中書令加封  
申王諡恭裕子六承顯襲封康國公終昭化軍節度使年七十



四贈太尉樂平郡王 德愿字公謹淳化初授右千牛衛將軍  
至左武衛大將軍卒年二十四贈涼州觀察使姑臧侯 德存  
字安世九歲授右千牛衛將軍歷監門至曉衛從祠泰山領樊  
州刺史祀汾陰遷左羽林大將軍卒年二十贈洮州觀察使洮  
陽侯子承衍禮賓副使 元孫叔近榮良公克類子建炎元年  
守秀州值杭卒陳通反詔辛道宗將西兵討之兵潰爲亂抵秀  
城下叔近乘城諭以禍福乃去未幾差權兩浙提刑招通聽命  
及入城猶不解甲叔近置酒推誠待之遂皆感服因奏通初無  
叛心緣葉夢得給賞不時遂至紛爭今已就招請赦其徒二百  
餘人帝許之已而王淵兵至杭詐呼趙秀州來給通郊迎遂誅  
之淵初在汴狎娼周氏銜叔近私之誣以通賊奪職被拘代者  
朱芾肆殘虐軍民怨憤小卒徐明率衆囚芾迎叔近領郡事奏

上未達朝命淵部曲張俊致討領兵至叔近出迎俊叱令正對  
方操筆未竟斬首于地明等遂反戈嬰城縱火驅掠俊捕誅之  
取周氏以歸于淵紹興九年御史訟其冤贈集英殿修撰 彥  
倬字安卿彭城侯叔聚曾孫饒州太守公廣之子初調溧陽尉  
豪民潘氏兄弟號三虎彥倬按治之皆正其罪改揚州司戶攝  
獄掾有告主藏吏匿錢千萬彥倬察其情實諸吏共貸者許以  
自首免罪一日而畢改平江推官攝宜興縣自軍興百凡預借  
民得挾此慢易其令彥倬請禁之邑遂易治擢知於潛執黜胥  
滑吏不得與臺省吏通積弊遂息陞通判臨安開禧初知興國  
軍時歲旱蝗軍需益急令吳格方負上供銀貶秩彥倬謂宜寬  
民力以崇根本有潰卒斬之散其餘黨累遷湖南運判徭人羅  
孟傳反帥從彥倬計遣謀者離其黨與俾還自相讐卒降之尋

知紹興惠楮價輕權之以法民稱其便復鹿鳴禮置興賢莊以資費築捍海石塘亦置莊以備增築旱饑第民高下差損賦稅免輸湖籍田米舉緡錢四十萬以助荒政賴濟者衆擢太府少卿直顯謨閣知太平調江西轉運使卒于官年六十四 彥逾字德老崇簡國公叔寓曾孫登進士擢知秀州累遷大府少卿四川總領初入境安丙來迓從容問挺衆六萬多有虛籍丙以情告俾悉簡損以寬民賦挺不求隱改知鎮江適旱饑節浮費發粟振糴民賴以濟遷戶部侍郎工部尚書殿帥郭杲嘗被誣彥逾爲白于帝故杲與彥逾善趙汝愚遣中郎將范任告杲立嘉王事杲不應任以告彥逾乃大喜力贊決策馳語杲曰樞密第能謀之太尉爲國虎臣當任其責杲未及對彥逾急責之杲許諾領兵爲衛遂協濟大計寧宗卽位冀引已共政汝愚謂我

輩宗臣不當言功以爲端明殿學士出知建康兼江東安撫使  
意殊舛望未行改四川安撫置制使兼知成都凡兩入蜀政皆  
不擾大有聲譽蜀人安之侂冑論前功累遷資政殿大學士嘉  
泰間知明州兼沿海制置使乞祠卒議者以嘗奏復利西安撫  
吳氏兵權後致曠變多以爲咎

太祖四子長滕王德秀次舒王德林皆早亡次德昭字日新乾  
德二年冲幼出閣領貴州防禦使開寶六年改興元尹山南西  
道節度使檢校太傅同中書門下平章事太平興國元年兼侍  
中爲京兆尹授永興軍節度使封武功郡王朝與齊王廷美同  
班宰相上三年二月娶太傅王溥女封韓國夫人冬郊加檢校  
太尉四年從太祖征幽州軍中嘗夜驚不知上所在有謀立之  
者上聞不悅及歸以北征不利故久不行大原賞德昭以爲言

上怒曰待汝自爲之賞未晚也德昭懼退而自刎上聞驚悔往  
抱其尸哭曰癡兒何至此耶贈中書令追封魏王諡曰懿真宗  
贈太傅改封吳王乾興初加太師又改封越子五人 惟正蚤  
有疾爲保信軍節度觀察留後封樂安郡公卒贈侍中追封同  
安郡王諡僖靖無子以惟忠子從蘆嗣從蘆官至左龍武大將  
軍溫州團練使少好學以剛褊廢贈濟州防禦使濟南侯 惟  
吉字國祥母鄭國夫人陳氏孝章后與太祖皆愛之夜啼必自  
起撫抱稍長日令誦讀作弱弓輕矢射以金錢爲的常乘小車  
黃門擁抱出入太祖崩歲六歲晝夜哀號后慰諭始進粥賜以  
帝后畫像服玩器用歲時莫享哀慕甚至宗室稱其賢太宗卽  
位猶在禁中日侍食太平興國八年出居東宮授左監門衛將  
軍封平陽侯加左驍衛大將軍安定郡公淳化四年遷左羽林

衛大將軍閬州觀察使凡郎弟供億車服賜予與諸王埒自餘  
王子不得偕也真宗授武信軍節度使加同平章事封泰山改  
感德軍有疾上屢臨省親視灼艾給御膳且爲佛事薨年四十  
五廢朝贈太尉中書令諡康孝天性好學善屬文工草隸飛白  
其宗次爲七卷御製片命藏祕閣明道二年追封冀王七子守  
節累遷彰化軍節度觀察留後同知大宗正事卒贈鎮江軍節  
度使追封丹陽郡王諡僖穆子世永襲邢國公終鎮南軍留後  
贈昭信軍節度使南康郡王諡修孝世延終右武衛大將軍絳  
州防禦使贈武寧軍節度觀察留後彭城郡公守約終內園使  
康州刺史贈沂州團練使子世靜至左武衛大將軍均州防禦  
使贈鎮海軍節度觀察留後北海郡公世長終左武衛大將軍  
解州防禦使贈彰信軍節度觀察留後濟陽郡公守巽慶曆十

年襲封官至和州防禦使贈武成軍節度使楚國公子世清累  
官茂州防禦使封中國公熙寧中遷越州觀察使襲懿王後封  
越國公進會稽郡王至保信軍留後愛諸弟作棣萼會於邸中  
元豐中升祔四后受命告廟力疾力就事薨贈安化軍節度使  
開封儀同三司封號王諡恭安子令廓嗣守度終左領軍衛大  
將軍英州團練使贈廣州觀察使廬江侯守廉終供備庫副使  
贈內藏庫使守康至供奉官 惟固字宗幹初名元展賜改今  
名授左千牛衛將軍昌州團練使卒子從信封楚王諡安僖子  
二世福官至集慶軍節度使薨贈儀王世達封益國公子令應  
見後 惟忠字令德初名文起賜改今名授右千牛衛將軍四  
遷右龍武軍左監門衛大將軍敘州刺史終昌州團練使贈鄂  
州觀察使江夏侯明道二年加贈彰化軍節度使舒國公子八

人從將累官西染院使卒贈磁州刺史東萊侯子世規襲封崇  
國公官至右龍武大將軍沂州防禦使從謁襲封潁國公終左  
衛大將軍齊州防禦使贈武勝軍節度觀察留後追封韓國公  
子三人世豐終太子右衛率世準爲人內恕外嚴無綺羅金玉  
之好凡郊廟必從累授金州觀察寶靜軍節度使薨年六十八  
贈開府儀同三司追封成王世雄少力學知名與子令鑠熙寧  
中應詔皆以材能表見嘗請營都宅以處疎屬立三舍以訓學  
者詔用其議置兩京敦宗院六宮各建學徽宗拜崇信軍節度  
使知大宗正事崇寧四年薨年七十五贈太尉追封潁王諡恭  
憲令鑠官至寶文閣待制子子直見後從信初封榮國公官至  
雄州防禦使贈保寧軍節度使楚國公謚安僖從秉從穎並禮  
賓使從謹宜城侯見後從質內殿崇班從謙出繼 惟和字子



禮歷龍武將軍領澄州刺史終右千牛衛大將軍年五十六贈  
汝州防禦使臨汝侯明道二年加贈永清軍節度觀察留後追  
封清源郡公雅好學爲詩清麗工筆札優游典籍以禮法自居  
宗室推重仁宗對王旦稱爲皇族之秀錄其藁二十二軸親製  
序藏于祕閣子二從審終復州防禦使贈寧國軍節度觀察留  
後宣城郡公坐帷簿除名從誨終左金吾衛大將軍台州團練  
使贈襄州觀察使襄陽侯子世開七八歲日誦萬言既長學問  
該治事後母孝撫孤姪如已子宮官吳申薦其學行命試學士  
院神宗褒異之召對便殿言宮僚缺當卽補不當以他官攝使  
私謁公行宗女當嫁宜銓擇不當以貨取使富室濫冒帝嘉納  
著爲令官至奉國軍留後贈開府儀同三司追封信王謚憲敏  
先是熙寧中詔封太祖後爲安定郡王奉太祖祀世世勿絕

首封秦王孫從式已而更封燕王曾孫世準堯世開嗣堯世雄  
嗣堯世福嗣堯令盈嗣堯令庇以年長爭襲朝廷從禮部郎王  
若正言燕王太祖長子正當襲封令庇小宗不與之並議遂定  
自宣和末停封至紹興初令話始得襲授寧州觀察使右武衛  
大將軍堯贈開府儀同三司自此至嘉定襲封者十五人惟四  
人迹頗著餘皆媿媿無聞 令時字德麟蚤以才敏開元祐六  
年簽書潁州公事蘇軾嘗薦于朝及軾被竄坐交通司金已而  
附內侍譚稹以進頗違清議紹興初官至右朝請大夫改右監  
門衛大將軍榮州防禦使權知大宗正事遷洪州觀察使終寧  
遠軍承宣使贈開府儀同三司 令玘由邵武軍兵馬都監襲  
封授華州觀察使除同知大宗正事 令憲字深之授右班禁  
直遷東頭供奉官累監州縣場庫薛昂薦其才易承事郎累賴

州簽書緇州通判歷知慶源府召除衛尉少卿遷秘閣修撰建炎二年分西外宗子於泰州命知其事旋除御營司參贊軍事挈宗子避地福州因置司焉尋改集英殿修撰閩州觀察使同知大宗正事遷鎮東軍承宣使終保平軍節度使年七十五贈少師追封惠王諡襄靖子子游官至湖北提刑王侯薦直秘閣知南外宗正司宗官用文臣自茲始 令衿嘉孝穆公世峽子博學有文舍選中等除軍器少監以言事忤旨屢奪官紹興七年召爲都官員外郎知泉州建祠合祀隱士秦系唐相姜公輔郡人感其化爲檜黨所訴誣以謗訕朝政追一官停勒者十餘年檜死起爲秘閣修撰知合州徙紹興權戶部侍郎尋知慶遠軍承宣使薨贈開府儀同三司 令諡字君序初補右班殿直遷承忠郎召試授從事郎復試舍選合格授宣敎郎調信州永

豐縣丞累遷福州運判兼提點刑獄領嚴饒二州鑄錢局請以  
所積兵匠缺籍衣糧付諸監省朝廷降銅本錢又州縣所賣官  
田計所入高下守令進秩減磨勘有差義倉紅腐請歲出三之  
一以易新粟木旱爲災檢放不及七分處所卽許振恤皆從之  
隆興初同知大宗正事奏減生日支賜并郊祀賞給以助軍興  
詔褒之遷敷文閣直學士特授左中大夫知紹興府引疾乞祠  
歸薨年六十八生平蒞事明敏有丰采然在閩日與副使章菱  
不協陰中以法陷於死世以此少之 令德乾道元年爲武德

郎授定武軍承宣使薨武德郎令檣襲除金州觀察使薨武翼  
郎子棟襲薨忠訓郎子彤襲授容州觀察使薨年八十餘慶元  
元年忠翊郎子恭襲授利州觀察使薨嘉定二年子昺襲授金  
州觀察使薨嘉泰四年伯栢襲授宣州觀察使薨嘉定元年伯

祝襲授福州觀察使。堯八年，伯澤襲授潭州觀察使。子洎字正之，幼警悟。蘇軾語其父曰：「此公家千里駒也。」及長，善談論。工詩。初，蔭補承務郎，累遷少府監。河南少尹時治西內事，有未便，輒力爭。漕使朱昇器之，改容以謝。除蔡河撥發綱運官。會旱涸，轉餉後期，貶秩。復提舉三門白波輦運事。除直秘閣，內艱起復。累進龍圖秘閣修撰。除陝西運副，民病蔡京火錫錢壅滯，子洎請鑄小鐵錢以權之。範格以進。徽宗御書「宜和通寶」四字爲文，旣成，奏許民以舊易新。旬日得銅錢百餘萬緡。御札復行新錢五路，均糴細麥，命領其事。時苦限迫，子洎請寬其期。民以爲便。京再相，言者希意論其亂錢法落職。奉祠居洛。靖康初，復修撰。因避金禍，奔于荆南。值潰兵祝靖盛德，破城，子洎匿民家。靖等來謁，言京城已破，子洎泣語之曰：「君輩宜亟還都城，護社稷。」

取功名無徒煩擾州縣皆應曰諾因草檄趣之翼日靖等送北  
紹興元年召見除徽猷閣直學士知西外宗正司俄遷江西都  
轉運使會建督府軍須浩繁運餉不絕以功進寶文閣直學士  
三京新復改京畿都轉運以疾卒年六十七爲人有幹材然崇  
寧大觀間土木繁興每令董役不辭識者鄙之 同時五世孫  
子松字伯山登進士官至宗正少卿徽猷閣直學士知淮寧府  
汴京失守以書白康王遂與知潁昌何志同等結盟傳檄中外  
諸路時朝命隔絕凡有事宜並取大元帥府裁決已而引兵趨  
襄邑遣范瑱徐文忠勸進王命子松克帥府參議官東南道都  
總管移書責張邦昌速宜反正其家在廬州檄通守趙令儵幾  
察之誅其母子以絕姦心又遣書責王時雍亡人之國會邦昌  
遣使迎王次第白王請先謁宗廟覲母后明正誅賞降赦四方

罪宜撫范訥逗撓營私。蠲免被兵州縣租。及經理淮南荆浙形勢之地。毋爲羣盜所據。又上奏隆祐太后曰。諸路先聞二聖北遷。易姓改國。恐有假討逆之名。以竊據州郡者。乞速下明詔。諭四方以迎立康王之意。庶幾人心慰安。奸宄自消矣。尋以所部兵會濟州。王卽位。首請放諸路常平積欠錢。又言崇諫爲人主耳目。近年用非其人。率取旨言事。請遵舊制。聽學士中丞互舉。先朝范祖禹常安民上官均言事盡忠。請錄其子。帝皆可之。又建三屯之議。一屯瀋陽。一屯河中陝華。一屯青鄆間。以張聲勢。萬一敵騎南侵。三道並進。可成大功。除延康殿學士知鎮江府兩浙路兵馬鈐轄。復諭王時雍徐杲吳玠莫儔范瑄胡思王紹王及之顏博文余大均等罪惡望肆諸市朝。以爲臣子之戒。時滑州兩經殘破。薦除傅亮滑州通判黃潛善沮之。賊趙萬犯

鎮江調鄉兵乘城爲備頃之聞官軍敗歸兵遂驚潰子崧不得已率親兵保焦山御營統制辛道宗與子崧有隙因錄其曩時起兵勤王檄文以爲言涉不遜詔御史往案帝震怒不欲暴子崧罪坐以擅棄城降單州團練副使安置南雄卒紹興二年赦復集英殿修撰 子櫟登元祐進士靖康中歷官守汝州金人再破荆湖諸州子櫟獨保境土李綱言于朝遷寶文閣直學士尋提舉萬壽觀卒 子畫字叔問少警敏強記工書翰累官憲州通判宣和初克詳定九域圖志編修官出知澤與密州遷刑部員外郎以憂去建炎四年歷吏部左司兼權貨務歲收茶鹽香錢六百九萬餘緡以功進一秩試太常少卿集太常因革禮八十篇爲二十七卷請復春分祀高禘禮權禮部侍郎遷徽猷閣待制樞密都承旨官制改後始用文臣久之知秀州奉祠歸



寓于衛卒年五十四 子砥令珣子仕至鴻臚丞北遷至燕山  
久之遣其徒朱國寶王孝安至中京求得上皇宸翰懷之潛以  
遁歸建炎二年六月至行在帝命輔臣召問于都堂言金人講  
和以用兵我國歛兵以待和往者金與契丹主和十餘年間遂  
遭被滅今復蹈其覆轍譬如人畏虎必設陷穽待之庶能制虎  
朝廷不能行命復故官知台州卒 師鼻字從善從謹五世孫  
高祖世恬崇國公會祖令峻嘉國公中興初韓世清挾以爲變  
裂黃旗被其身令峻固拒獲免祖子笈朝奉郎父伯驢和州防  
禦使少以文藝侍高宗于康邸師鼻登進士歷官司農簿金部  
郎中孝宗奇其才顧遇頗厚嘗奏左右曹度支倉部宜立總計  
司歸併財物之數以絕吏奸制可除知吉州卽山鍊餉補欠額  
二十萬進戶部郎官淮東總領光宗初擢太府少卿知秀州改

淮南運判時鐵錢不行鹽商阻滯師彝請發度牒出倉粟以收  
鐵錢鹽利遂通累遷司農卿以附韓侂冑得知臨安府有僧號  
散聖以妖術惑衆捕治繫之侂冑生日百官爭貢珍異師彝最  
後至出小盒侑觴啓之乃粟金蒲萄架上綴大珠百餘顆價值  
不貲衆慚沮侂冑愛妾十四有獻北珠冠四以遺四妾其十人  
亦欲得之未有以應師彝亟出錢十萬緡市珠製十冠以獻轉  
工部侍郎他日飲南園過山莊侂冑顧竹籬茅舍曰此真田間  
氣象但欠雞鳴犬吠耳俄聞犬吠雞鳴薄間視之乃師彝也因大  
笑遷爲尚書復知臨安嘗鈞致民罪沒其家貲會將用兵師彝  
知侂冑材疎意廣必且召亂遂持異議鄧友龍劾罷之侂冑死  
奸黨多謫師彝獨因是復用除寶謨閣直學士知鎮江荆湖始  
置閫卽以命之給事中蔡幼學繳駁罷歸未幾復起爲兵部尚

書三知臨安幼學時爲學士亦不草詔留元剛草之師弊治有能聲時楮輕糴貴未數月楮價寢昂糴亦稍平執政愈以爲賢會以事捷武學生柯子冲盧宣德合三學生投牒効能與祠卒年七十四公論鄙之同時八世孫希懌字伯和登進士趙汝愚辟爲屬吏嘗言治人如修身治政如理家愛民如處昆弟取古今官著惠愛者緝爲一編汝愚嘉之薦于辛棄疾辛素尚氣僚吏不敢與可否希懌獨盡言無所避蜀邑侯官苦稅重每不登額爲稽公帑羨錢以足之棄疾薦其能調江東運司幹辦同寅有坐侂冑黨者諸司莫敢薦希懌賢其人請以已劾薦之改太平州通判舊例黥盜逃卽處死爲平其法得減死論遷江西茶鹽提舉歲饑惡少聚劫希懌自臨按視發粟賑給捕治其首惡餘黨解散民亦得食還本路帥兼漕事奸民潛通糴世傳陰

濟以糧希憚重法禁之未幾李元礪寇郴陳廷佐寇南安有何  
光世者能知賊動息希憚授以計俾誘世傳誅元礪以自贖廷  
佐勢孤亦降除知平江移太平習知其民利病損折市價減權  
酷額以蘇民力乞祠還端明殿學士換招信軍節度使開府儀  
同三司致仕卒年五十八贈少保封成國公 令憲元孫希言  
字若訥登進士調衢州司戶叅軍守令計合郡民爲表其坊里  
標其戶數置園以獻守得而才之時衢已復孔步章鼓二場漕  
帥復檄訪嚴州烏龍嶺稅場希言力陳不當復且謂二場當併  
罷帥怒然終不能奪未幾果廢改吉州司理歷淮西總所幹辦  
公事移書約諸郡綱必以時發至卽受納一無滯留始至軍庫  
見錢不滿千緡比去克溢擢知仁和闢廣學宮大旱蝗驅卒燔  
之臨平湖決爲築堤捍禦親捧土投石兵民爭奮後不復決民

病和買絹折錢希言爲節公費代輪除大社令遷密院編修兼  
右司郎官上言諸將各務城守敵來不拒去不復追異時之憂  
殆不止保江而已宜諭諸將一軍受圍諸軍出敵務以戰爲守  
毋徒自固遷宗正丞請許南班得與輪對歷秘書丞著作郎軍  
器少監克密院檢詳凡六年奉祠卒年六十一贈資政殿大學  
士封越國公諡忠憲子與權登進士再中刑法科官至開府儀  
同三司

寧宗養子詢燕王十世孫初名與愿寧宗旣失克王宰執京鎭  
等請養于宮中年六歲賜名曦除福州觀察使嘉泰二年拜武  
威軍節度使封魏國公聽讀資善堂開禧元年五月乙亥爲皇  
子進封榮王加開府儀同三司用翊善史彌遠計奏韓侂冑輕  
起兵端將危宗社宜賜諡殛以安邊境事成立爲皇太子更名

轉上每御朝命太子侍立宰執日赴資善堂會議尋用天禧故事宰輔大臣錢象祖兼太子少傅衛涇雷孝友林大中並兼賓客太子出居東宮更今名嘉定十三年薨年二十九諡曰景獻以荊州防禦使乃裕繼其後

次子德芳開寶九年出閣授貴州防禦使太平興國初除興元尹山南西道節度使同平章事三年加檢校太尉六年薨年二十三車駕臨哭廢朝贈中書令封岐王諡康惠真宗加贈太保又進太師收封楚王徽宗改泰王三子惟敘惟憲惟能

惟敘字懋功性純謹頗好學端拱初授左武衛將軍領勤州刺史從祀汾陰拜左千牛衛大將軍卒年三十五贈懷州防禦使追封河內侯明道二年加贈保靜軍節度觀察留後高平郡公子從昭慶曆中詔立十王後封安國公終左金吾衛大將軍歸

州團練使贈同州觀察使齊國公從溥至右侍禁內殿崇班  
惟憲字有則卽孝宗五世祖也少美丰儀頗縱肆長修謹善射  
好吟咏多讀道書端拱初授左屯衛將軍累遷左羽林將軍領  
演州刺史加左衛大將軍真拜資州團練使卒年三十八贈安  
德軍節度使兼侍中英國公子六人從式瓊封舒國公終保康  
軍節度使薨贈同中書門下平章事追封榮王諡安僖子世恩  
嗣封楚國公遷楚州防禦使卒贈定國軍節度使諡良僖從演  
禮賓副使從戒從湜並內殿崇班從賁供奉官 從郁封新興  
侯子世將封華陰侯世將子令儉東頭供奉官封慶國公令儉  
子子偶卽孝宗父子偶宜和初舍選合格調嘉興丞召赴都堂  
審察改宗教郎通判湖州高宗卽位除直秘閣賜五品服召對  
言宗室之寓于外者尚衆請居官舍選尊長鈐束之年未十五

柑州小學十五入大學許依進士就舉未官者亦許入學講讀  
及一年聽參選上納其說遷朝奉郎以秘閣修撰知處州俄許  
奉祠累官左朝奉大夫紹興十三年致仕明年九月丁巳卒于  
秀州給錢營葬詔侍從臺諫議普安郡王所服秦熈等請解官  
如南班故事普安亦自請持服許之及建節以恩贈太子少師  
立爲太子加贈太師中書令封秀王諡安僖配張氏封王夫人  
內禪詔稱皇伯夫人爲皇伯母乾道三年三月皇伯母薨帝成  
服于後苑百官進名奉慰時園廟制尚未備紹熙元年始卽湖  
州秀園立廟奉神主建祠臨安府以藏神貌如濮主故事仍班  
其諱 子伯圭字禹錫孝宗同母兄以恩補將仕郎調華亭縣  
尉累官浙西提刑幹辦公事通判明州受禪除集英殿修撰知  
台州頗著政績改敷文閣待制徙明州充沿海制置使有蕃商



死吏請沒入其貲伯圭不可令護喪及貲以歸陞敷文閣直學  
士丁憂服闋再知明州新學官命宗子入學閤以規矩奏定海  
當控扼之衝當嚴兵備請摘制司軍以實許浦降海寇葛明禽  
其黨倪德二人以功累龍圖閣學士在郡十年政尚寬和浚湖  
陂均水利辦冤獄嘗獲鑄錢者不忍寘法諭令易業民無再犯  
淳熙三年遷安德軍節度使尋加開府儀同三司克萬壽觀使  
朝德壽宮賜玉帶加少保封滎陽郡王高宗崩克攢宮總護使  
除少傅光宗陞少師踰年遷太保封嗣秀王賜甲第安僖祠側  
諸子並換南班不責吏事惟安享富貴紹熙二年判大宗正事  
建請別立宗學以教宗子三年進太師慶元初兼崇信軍節度  
使還湖州嘉泰二年薨輟朝三日追封崇王諡憲靖伯圭性謙  
謹不以近屬自居每入見行家人禮雖宴私隆洽執臣節愈恭

一日帝問潛龍時事辭曰臣老不復能記憶問至再三終不言  
帝笑曰何太謹也益愛重之嘗欲廣其居重湖爲複閣有司度  
材固辭而止阜陵成遷中書令凡五讓寧宗嘉其志詔別議褒  
崇之禮贊拜不名肩輿至殿門子九人師夔字汝一以恩初  
調蕪湖簿隆興元年改右承務郎歷台秀二州通判直秘閣尋  
知徽州新學舍進直徽猷閣知湖州所領歸附從軍者衆時不  
能給請增廩仍別給餼星錢以安其心帝稱善詔諸郡行之除  
直龍圖閣遷累浙西提刑江東運判奏建康務場侵奪民利乞  
罷之守臣以郡計所資請復不從池州軍帥霍政與守臣交攻  
詔究曲直師夔具言其狀政坐罷改秘閣修撰知明州兼沿海  
制置加敷文閣待制轉承慶軍承宣使紹熙元年侍父入覲除  
興寧軍節度使寧宗加檢校少保克阜陵橋道頓遞使陵成遷

開府儀同三司侍父歸薨未踰月亦卒年六十一贈少師追封  
新安郡王 師揆字元輔初補右承務郎奉祠除添差湖州簽  
判改婺州通判加直秘閣守臣韓元吉薦其材上以問史浩言  
其聰爽可任召對除江東提舉奏免失陷常平人毋責償改淮  
南漕尋遷淮西提刑兼提舉領屯田事奏以荒圯給軍士勿奪  
屯田爲民世業者從之代還吏請獻美錢二十萬不聽除直秘  
閣改江東運副秘閣修撰知明州紹熙元年授觀察使寧宗除  
奉國軍承宣使尋陞節度使召見賜肩輿還檢校太保開府儀  
同三司克萬壽觀使襲封薨贈太傅追封愷王諡恭惠 師禹  
嘉定八年由保康軍節度使除開府儀同三司襲封薨贈太傅  
追封和王諡端肅 師垂師高師臯師崑師彌師貢俱嗣秀王  
理宗初師彌爲檢校少保至少師保寧軍節度使緒定六年判

大宗正事淳祐五年詔獎典司屬籍職事修舉授太傅加食邑  
寶祐六年薨師貢奉國軍節度使克萬壽觀使卒

惟能字若拙端拱初授右屯衛將軍累遷右神武大將軍卒年  
二十贈蔡州防禦使張掖侯明道二年加贈集慶軍節度觀察  
留後南康郡公子三人從古襲封安國公終延州觀察使贈保  
靜軍節度使同中書門下平章事楚國公諡惠恪從善內殿承  
制從贊崇班

孝宗堂弟伯玖乘義郎子彥子也伯玖生而聰慧年七歲同選  
入宮高宗命吳才人母之賜名璩字澗夫除和州防禦使孝宗  
就傅獨居禁中改授節度使封吳國公宰執趙鼎劉大中王庶  
持其議不欲與皇子並久之不下紹興九年三月丁亥除保大  
軍節度使封崇國公尋詔赴資善堂聽講十五年加檢校少保

進封恩平郡王出就外第與普安官屬禮制相等號東西府踰  
年改武昌軍節度使二十二年子彥卒去官持服終喪還舊官  
普安建儲名位遂定加恩稱皇姪遷開府儀同三司判大宗正  
事置司紹興孝宗卽位特授少保靜江軍節度使時上友愛屢  
許入朝召宴內殿呼以官不名賜予無算王累章乞間改醴泉  
觀使淳熙中除少傅高宗崩奔赴得疾踰年薨年五十九追封  
信王累贈太保太師子四人師淳歷忠州團練永州防禦使師  
灝師濬師路並武翼大夫孫希林保義郎

冊曰南北兩朝相爲終始繼世而興所由一理身雖不傳  
天未嘗廢吁嗟秀王昌後永世